

عملية نوح حسين



على سالم

اهداعات ٢٠٠١

١. صلاح وانج

القاهرة

عملية نوح

عزى سالم

الفلاف
الفنان بهجت

بدأت تلح على فكرة مسرحيتي في نهاية عام ١٩٧٢ ، عندما بدأ
يتملكني الإحساس بأننا في طريقنا للتحلل والضياع والفرق ، وأقول
بصدق شديد أن كل ما كان يحدث حول ، لم يكن يوحى بأنه ستكون
هناك معركة ما . .

وهناك تكن عبقرية أنور السادات ، لقد مهد للعمليات العسكرية
بخطة شديدة الإتقان من الخداع العام ، أقيمت العدو والصديق على حد
سواء بأن الحرب أمر بعيد . .

ثم ضرب ضربته . .

وبذلك أنقذ مصر من الفرق . . وهذه هي - ببساطة - فكرة
مسرحيتي . لقد كان قرار القتال قراراً شجاعاً ، وأشجع منه كان قرار
السلام ، لأن الحرب لم تكن يوماً ، هدفاً في حد ذاتها ، ولكنها كانت ،
ويجب أن تكون ، وسيلة من أجل السلام . .

بقي أن نفهم جميعاً أن هؤلاء الذين ماتوا أو فقدوا أجزاء غالية
من أجسامهم على أرض سيناء ، لم يموتوا من أجل استعادة الأرض فقط ،
لقد ضحوا بحياتهم من أجل أن نحيا نحن حياة أفضل . . من أجل أن نحيا
في مصر نظيفة : مصر الحرية والديموقراطية والكبرياء . . ومن هنا

كانت حرية التعبير وإغلاق المعتقلات وسيادة القانون ، أمراً حتمياً ..
وسوف يكون من الحياة لهُؤلاء الشرفاء الذين ماتوا .. أن نخسر معركتنا
هنا في شوارع المدينة .. ضد التخلف والجهل والبيروقراطية ..

إلى أخى أحمد وزملائه الذين أنقذونا من الفرق ..

إلى هؤلاء الذين دفعوا بموتهم ثمن أن نحيا ، إلى أطهر وأشرف
من أنجبت أرضنا .. إليهم جميعاً .. أهدى مسرحيتي ..

على سنالم

الفصل الأول

المشهد الأول

(قاعة المجلس الشعبى لمحافظة مصر كما يسميها الناس،
أو محافظة القاهرة كما تسمى عادة في المكاتبات الرسمية،
بعض ممثل الهيئات يجلسون بينما يتوافد باقي الأعضاء ..
يتبادلون التحية بأشارات وقورة لا تخلو من تكلف ..
كما يتبادلون أحاديثاً هادئة تلفها ابتسامات مصقولة ..
الحديث يتناثر في القاعة ولا أهمية كبيرة في
بداية المسرحية لمرفة هوية المتكلم ، الحديث التالي
يدور بين مسئول كبير ومسئول صغير . . المسئول
الصغير في تنغالب هو مدير الاحتفالات)

- المسئول الصغير : أهلا باسعادة البيه ..
المسئول الكبير : أهلا بيك ياعزيزى ..
م . الصغير : سيادتك يافندم ، كنت رائع امبارح ..
م . الكبير : أشكرك ..
م . الصغير : حقيقى يافندم . . . حضرتك امبارح لخصت
الموضوع ببساطة شديدة جدا ، وبطريقة
مقنعة تماما ..
م . الكبير : أشكرك ياعزيزى . . . اصل ..
م . الصغير : (بحفاوة مبالغ فيها) .. والله يافندم ..
بالرغم انه كان عندى شغل مهم امبارح في

المكتب ، الا انى كنت حريص انى آخذ معايا
التليفزيون الترانزيستور .. عشان اشوف
سيادتك ..

م . الكبير : (وقد بدأ يتضايق) .. اشكرك .. الواقع
أنك بتجاملنى أكثر من اللازم (يحاول تغيير
مجرى الحديث) .. هو .. هو التليفزيون
الترانزيستور ده بكلم ..

م . الصغير : والله يافندم ... أنا جبته رخيص جداً من
السوق الحرة ... واحنا راجعين من ندوة
الأشتراكين فى فرنسا ... وجاى لى واحد
تانى لو تحب سيادتك أبعتهولك .. هو ثمنه
تقريباً ثلاثة جنيه وسبعين قرش ..

م . الكبير : شكرا يا أخى ... شكرا جزيلاً ..
م . الصغير : حقيقى يافندم والله .. كلامك امبارح ، وده
مش رأى لوحدى .. أنا سألت ناس كتير من
اللى شافوك امبارح .. ناس عاديين ، من
البسطاء دول ، اللى هم بيمثلوا فى مجموعهم
شعبنا المناضل .. كلهم اجمعوا أن حديث
حضرتك فى التليفزيون امبارح .. كان ..
كان .. أكثر من رائع ..

م . الكبير : عزيزى .. أنا .. أنا ما تكلمتش فى التليفزيون
امبارح ..

م . الصغير : (باضطراب شديد) .. ازاي يافندم .. هو
مش كان فيه برنامج مع سعادتك امبارح
الساعة سبعة ونص على الهوا .. ده معلن عنه
فى كل الجرايد ..

م . الكبير : فعلاً .. بس أنا مارحتش ... أنا معانديش

عربية .. وما تمكنتش انى أروح التلفزيون
فى ميعادى ..

م . الصغير : آه .. يبقى برنامج قديم يافندم .. وبيعيدوه ..

: (متهرىبا) .. جاز ..

م . الصغير : لكن حقيقى يافندم .. كلامك امبارح ..

م . الكبير : (يمنع نفسه من الانفجار) .. أرجوك

ياعزيزى .. أرجوك .. أرجوك .. أنا عمرى

ما تكلمت فى التلفزيون فى حياتى .. لسه

برضه مصر انك شفتنى امبارح فى التلفزيون ..

م . الصغير : (يكاد يغمى عليه) الواقع يافندم .. الظاهر

التلفزيون بتاعنا .. يعنى .. الشاشة

بتاعته .. (يلوح شخصية مهمة تدخل

القاعة فيهرع للاقاتها) .. عن اذنك يافندم

(يصفح الداخلى بحمارة شديدة)

م . الصغير : أهلا يافندم .. الف مبروك يافندم ..

ياريت يافندم كنت جيت بنفسك تشوف الناس

البسطاء امبارح .. وهم بيرقصوا لما عرفوا

أن سعادتك حاتمك المؤسسة ..

الشخصية المهمة : ما هو أنا ماسكها من شهرين .. الخبر اللى

نزل فى الجرايد النهارده .. خبر قديم ..

م . الصغير : (باعجاب شديد) .. ياسلام .. ياسلام ..

بقى الناس اللى أنا شفتها فرحانة ، بترقص

عشان تعيين سيادتك .. بيرقصوا بقالهم

شهرين .. دى حاجة عظيمة فعلا .. عن

اذنك يافندم ..

(بيتمد ليقابل أحد الداخلىين)

(الحوار التالى يدرر بين المسئول أ .. والمسئول ب)

- ١ : تصور ... بلفت بيهم الصفاقة انهم يختلسوا
من المشروع خمسين ألف جنيه ..
- ب : اعوذ بالله ..
- ١ : ما سكتش طبعاً ... بلفت النيابة ... كل
موظفى المشروع دخلوا السجن امبارح ..
- ب : وبعدين ..
- ١ : خرجوا النهاردة ، بكفالة ..
- ب : دول ناس مجرمين .. يختلسوا خمسين ألف
جنيه ، من مشروع صغير زى ده .. هنى
ميزانية المشروع كام .. ؟
- ١ : واحد وخمسين ألف ..
- ب : يعنى سابوا لك ألف فى المشروع .. ؟
- ١ : كانوا حايلخدوه هو رآخر .. بس أنا لحقته
منهم على آخر لحظة .. الخطير يامحسن بك
انهم مش حرامية وبس ... بل وفاقدى
الأخلاق أيضا ..
- ب : اعوذ بالله ...
- ١ : ما يشوفوش حديبجيا فى سعة من الرزق .. الا
ويحقدوا عليه .. يتقولوا عليه .. ويحاولوا
تلويث سمعته .. تصور أنهم بيتقولوا على
أنا ..
- ب : مش معقول ..
- ١ : والله العظيم .. تصور .. يقولوا العمارة
اللى فى كامب شيزار اشترها منين .. والعمارة
اللى فى السيدة زينب بناها ازاي .. والثلاث
عربيات اللى عنده ، جابهم منين .. والفيلا
اللى فى المجمعى .. عارفها حضرتك طبعاً ..

الفيلة الصغيرة اللي انا عزمك فيها الصيف
اللي فات ..

ب : أيوه .. عارفها .. مالها .. ؟
ا : برضه جاوا سيرتها في التحقيق .. تصور ..
عاوزين يجيبوا رجلى .

ب : اما مجرمين صحيح ..
ا : بس مع مين .. كل الحاجات دى باسم
مراتى ..

(العبارات التالية تتناثر في القاعة)

- : هو ميعاده الساعة كام .. ؟
..... : اتناشر بالظبط ... اتناشر الا خمسة
دلوقت تقريبا ..
..... : تفكر انه جاي بخصوص الدفاع الشعبى ... ؟
..... : جايز .. بس احنا عمرنا ما سمعنا عنه ..
هو صحيح عضو اللجنة المركزية .
..... : أيوه ..
..... : ده شخص غريب جدا .. اسمه نوح .. نوح
محمد على ... عمره ما طلع اسمه في
الجرايد .. وعمره ما تنشر له صورة ..
ومع ذلك يقال انه شخص مهم جدا ...
..... : الظاهر المسئلة خطيرة ... لى صديق في
المجلس الشعبى في بنى سويف .. سافر
النهاردة الصبح ، لأن عندهم اجتماع مهم
الساعة اتناشر برضه ..
..... : وأسيوط كمان ... الظاهر المسئلة على
مستوى الجمهورية ..

- : أكيد فيه حرب ..
- (الحديث التالي يدور بين المسئول - والمسئول د
وبجوارهما مجلس توحيد وهو شاب وسيم في الثلاثينيات)
- ح : اللي يقرأ المقال بتاع امبارح ... يتأكد ان
مفيش حرب ..
- د : آه يا أخى .. قرينه .. ده وصف خط بارليف
بطريقة تؤكد ان التحصينات اللي عاملينها ..
ولا الشياطين تعرف تقتحمها ...
- توحيد : الشياطين جازم ما تصرفش ... في الحالة
دى يمكن البنى آدميين تعرف ..
- ح : يا ابنى الصبور خسايه فظيعة ..
- توحيد : ومكاسبه ... ؟ حضرتك فكرت في مكاسبه .. ؟
- د : يعنى ممكن يحصل مدبحة للجيش المصرى ..
- توحيد : أحسن من المدبحة اللي حاتحصل للشعب
كله .. لو ظل الموقف على ما هو عليه ...
- د : المسألة مش مسألة شعارات .. مش الفاظ
منمقة .. (يلتفت لزميله) .. الافندى ده
مين ... ؟
- ح : ده شخص رزل قوى ... اسمه توحيد ..
مهندس معمارى .. معاه دكتوراه من
أمريكا ..
- د : يسارى ... ؟
- ح : هو زى ما تقول كده .. شيوعى يمينى ..
أو بالتحديد هو من وسط يمين اليسار ..
عارف انت النوع ده ..
- د : أبوه ... بيبقى رزل قوى .. (يلتفت لتوحيد)
.. بس أنا ما تشرفتش بمعرفة حضرتك ..

- توحيد** : دكتور مهندس توحيد المصرى .. والمعلومات الى قالها لك البيه .. مش دقيقة قوى ..
- أنا اتسجنت مرة مع الشيوعيين .. وما كنتش شيوعى .. واتسجنت مرة مع الاخوان ... وما كنتش من الاخوان ..
- د** : حاجة غريبة جدا .. ليه ؟
- توحيد** : زى البيه ما قال لك .. زل .. ياسعادة البيه . المسألة مش غريبة ولا حاجة .. اى شاب فى سنى .. يا اتسجن .. يا اما كان حا يتسجن .
- د** : مفيش داعى للتشاؤم ده .. صحيح انت حطك كان وحش .. بس مش هى دى القاعدة .. احنا فى اسرنا شباب كتير جدا .. من سنك .. ومع ذلك ما حصلهمش حاجة ..
- توحيد** : ولا حا يحصل لهم .. عائلة عبد الحاكم ، مشهورة جدا .. أنا اعرف شباب كتير منهم اعرف على عبد الحاكم ومجدى عبد الحاكم .. وابراهيم عبد الحاكم ..
- د** : كانوا معاك فى الدراسة ... ؟
- توحيد** : لا .. كانوا معايا فى المعتقل ... ظباط على شاونشية .. ولما خرجت من المعتقل .. كانوا برضه ما سكنين المؤسسات اللى اشتغلت فيها ..
- د** : وحضرتك ... يعنى .. قصدى .. ؟
- توحيد** : انا عارف يافندم من الاول ، أن حضرتك نفسك تسألنى عن مذهبى السياسى ..
- د** : اذا ما كانتش بضايقتك ..

توحيد

- : (يحقق في وجهه لحظة) ... أنا معجب
بأخواتون ..
: (يلتفت لزميله هامسا) ... معجب
بأخواتون .. أخواتون ده مين ..
: واضح من اسمه انه فيلسوف صيني ..
مش قلت لك من الأول أنه شخص رزل ..
العالم دول يموتوا في الفكر المستورد ..
(يدخل نوح ، وهو شاب في الثلاثينات ، يملو
وجهه بذلك النوع بن الاكثاب الذى يصاحب في
العادة أصحاب المثوليات الكبيرة ... صوته هادىء
وأسر .. يحمل في يده حقيبة متوسطة الحجم ، وشاشة
عرض سينمائي صغيرة ملفوفة على حامل ، يتجه على
الفور إلى المنصة ..)

نوح

- : السادة أعضاء المجلس الشعبى لمحافظة
مصر .. أقصد محافظة القاهرة ، السلام
عليكم ورحمة الله .. (ينظر في ساعته) ..
المفروض أن اجتماعنا يبدأ الساعة اتناشر
بالظبط .. فاضل دقيقتين .. ولذلك
حانت هز الفرصة دى .. وتتعرف على
بعض .. أنا نوح محمد على عضو اللجنة
المركزية ..
(كل منهم يقدم نفسه وهو جالس بأشارة خفيفة من
يده أو رأسه)

- : فلان الفلانى .. مدير التعليم ..
..... : فلانى الفلانى .. مدير المواصلات ..
..... : فلانى الفلانى .. مدير التموين ..
..... : فلانى الفلانى .. مدير الاسكان ..

- : اللواء فلان الفلانى .. مدير الأمن ..
- : فلان الفلانى .. مدير الدفاع المدنى ..
- : فلان الفلانى .. مدير الثقافة والفن
والسياحة ..
- : فلان الفلانى .. مدير الأوقاف والشؤون
الدينية ..
- : فلان الفلانى .. مدير الاعلام ..
- : فلان الفلانى .. مدير الخزنة العمومية ..
- : دكتور فلان الفلانى .. مدير الصحة ..
- : فلان .. سكرتير المجلس ..

توحيد
نوح

•••• : توحيد المصرى ... مهندس معمارى ..
•••• : (ينظر فى ساعته) .. اتناشر بالظبط .. وفى
نفس اللحظة دى .. لى زملاء فى كل المجالس
الشعبية لحافظات الجمهورية .. ييطرحوا
نفس الموضوع اللى حاتكلم فيه مع حضراتكم
... وهو أمر هام وخطير .. بل يمثل أعلى
درجات الخطورة والأهمية والسرية .. وقبل
أن نخرج جميعا من هذا المكان . سنقسم
بالحفاظ على سريته . على المصحف . والانجيل
.. والمسندس ..

(يخرج من حقيبته المسندس والكتابين المقدسين وبعضهما على
المنصة)

.. وأيضا .. أجد أنه من الضرورى أن
تعلموا ... أن أى كلمة ستترتب مما
سيدور فى هذا الاجتماع .. أنا بشخصيا
مكلف بأعدام من يقلها ومن يسمعها ..

سكرتير الجلسة : (يقف مرتعدا) .. لو سمحت يافتدم ..

- نوح
السكرتير
- : لحظة من فضلك .. لما أخلص كلامي ..
: أرجوك . أرجوك .. قبل ما تخلص كلامك ..
لو سمحت ..
: اتفضل ..
- نوح
السكرتير
- : ... يافندم . أنا مش سكرتير المجلس ..
: إمال أنت إيه ... ؟
: أنا القائم بأعمال السكرتير .. سكرتير
الجلسة الأصلية في إجازة ..
- نوح
- : خلاص ... انت اللي حاسجل وقائع
الجلسة ..
- السكرتير
- : أنا يافندم عمري ما اشتغلت في حاجة مهمة
ولا سرية ..
- نوح
- : يبقى المرة دي حاشتغفل في حاجة مهمة
وسرية ..
- السكرتير
- : أرجوك يافندم .. بلاش أنا .. المفروض أن
السكرتير الأصلي ..
- نوح
السكرتير
- : من فضلك أقعد . ببلاش تفرقنا في شكليات ..
: مش شكليات يافندم .. المسألة أخطر من كده
.. أنا طول عمري باشتغل في الإدارة الفنية
في المحافظة .. يعني فنان .. وانت عارف
الفنانين .. أنا عارف نفسي كويس .. أنا عمري
ما احتفظت بسر .. ده أنا باتكلم وأنا نايم يا
فندم .. فيه ناس كده .. لا يصلحون لأي
سرية . وأنا واحدمنهم .. أنا راجل ماشي جانب
الحيط وكافى خيرى شرى طول عمري ..
مفيش داعى انضرب بالنار في الآخر .. لمجرد
ان واحد خد إجازة وأنا اشتغلت مطرحة ..

أرجوك يافندم قبل ما ندخل في الجد .. اسمح
لى أنا استأذن .. وأنا أجيب لك حد من اللي
بيشتغلوا في الحاجات المهمة دى ..

نوح : من فضلك أقعد .. انت دلوقت عرفت جزء من
سر الاجتماع .. خليك راجل وتحمل
مسئوليتك ..

السكرتير : يافندم أنا لسه ما عرفتش حاجة خالص ..
هو حضرتك لسه قلت حاجة .. ؟

نوح : على الأقل عرفت ان فيه اجتماع خطر تم
الساعة اتناشر على مستوى الجمهورية ..
من فضلك أقعد .. وتأكد ، لو تسربت
كلمة واحدة عن طريقك انت .. أنا حاخليك
تندم على اليوم اللي اتولدت فيه .. انفضل ..

السكرتير : (على وشيك البكاء) .. يافندم كل اللي قاعدين
هنا ناس كبار جدا ... وكلهم لهم ضهر ..
أنا الوحيد هنا اللي غلبان قوى .. لوحد فيهم
اتكلم .. أنا اللي حاروح في داهية ..

نوح : انفضل أقعد ..

(سكرتير الجلسة يآق بحركة تم على الياص ، ينظر
حواله كأنه يستنجد بأحد ما .. ثم يجلس)
(نوح يفرد شاشة السيما الصغيرة على الحامل ويخرج
من الحقيبة بروجكتر ، يضع فيه شريحة ملونة ويضيؤه ،
في الوقت الذى تخفت فيه الإضاءة على المسرح ، تظهر
على الشاشة الصغيرة خريطة ملونة لوجه بحرى . نوح
يشرح على الخريطة بمؤشر صغير .)

نوح

: زى ما حضراتكم شايفين .. دى خريطة وجه
بحرى .. دلنا النيل .. الشاطئ الشمالى
لمصر .. فى السنوات الأخيرة ، لا حظنا أن
الشاطئ هنا .. (يشير لشاطئ البحر شمال
الديلتا) .. بتتاكل بمعدل أكثر من المعدل
الطبيعى .. وأن مياه البحر . أصبحت بتاكل
أجزاء كثير من الشاطئ ..

مدير الاسكان نوح

: لأن مقيش طمى .. لأن السد العالى ..
من فضلك ما تقاطعنيش ... فعلا كنا
متصورين أن هذا التاكل كان يحدث بسبب
انعدام الطمى عند مصبات النيل فى فرعى
دمياط ورشيد ولكن بمزيد من الدراسة ..
اتضح أن السبب غير كده خالص .. (يشير
لياه البحر) .. اتضح أن فى المنطقة دى ..
وعلى بعد مائة كيلو على وجه التحديد ...
حصل عدة هزات أرضية تحت المياه .. نتج
عنها تشققات فى قاع البحر .. تحولت بعد
ذلك الى ما يشبه الأخدود الصغير ..
.. الأخدود ده بيتسع .. وبيتمدد فى اتجاه
الوادى .. وادى النيل .. الأخدود فى
اتجاهه لأرض الوادى فعلا .. سرعته غير
منتظمة ... ولذلك ما نعرفش حايوصل
لنا امتى على وجه التحديد .. ولكن ... فى
تقدير الخبراء .. أن المنطقة اللي حايشمها
الأخدود .. هى دى .
(ينير الشريحة الملوثة ، فتظهر صورة وادى النيل كله
وقد تثلث باللون الأسود .. يطلق البروجكتر . إضاءة
المرح تعود لطبيعتها)

- سكرتير الجلسة : (هامسا في رعب) .. يعنى مصر كلها .. حا ..
 نوح : أبوه .. كمل .. قلها ..
 السكرتير : أقولها .. ؟ .. أنا ما قدرش حتى أتصورها ..
 وما أعتقدش فيه مصرى بقدر يتصورها ..
 نوح : للأسف اللى باقوله صحيح .. ومبنى على
 تقديرات علمية سليمة تماما .. هى دى المشكلة
 اللى أنا جاي أعرضها على حضراتكم النهاردة ..
 (سكون وصمت يشملان كل الموجودين لمدة ثوان)
 مدير الثقافة : وايه موقف الاتحاد السوفيتى .. ؟ ..
 نوح : موقفه من ايه ؟
 مدير الثقافة : موقفه من المصيبة دى .. ؟
 نوح : الظاهر حضرتك ما فهمتش كلامى .. احنا
 اللى حانغرق . مش الاتحاد السوفيتى ..
 مدير الثقافة : (يفقد أعصابه) .. ما قلنا لكم من الأول أن
 الاتحاد السوفيتى ده منيل ..
 توحيد : (محاولا تهدئته) .. عزيزى . المسألة اكبر
 من الاتحاد السوفيتى والاتحاد الأمريكانى ..
 انت متصور الاتحاد السوفيتى ممكن يعمل
 لنا ايه بالظبط . ؟
 مدير الثقافة : (صارخا فيه) .. اسكت انت ما تتكلمش ..
 أخرس خالص .. مانت زيهم .. أنت منهم ..
 أنا عارفك كويس .. اسكتوا ياولاد الكلب ..
 ضيعتونا ..
 (توحيد يحاول الرد .. ولكنه يسكت فجأة ويطلق
 برأسه إلى الأرض فى حزن)
 نوح : أستاذ فلان الفلانى .. حضرتك ممكن تهدأ
 وتقعد .. حاسمك لما أخلص كلامى ..

(يجلس وهو يمشي بمعض الكلمات غير المفهومة)

- مدير الاوقاف :** (يهيب صارخا) .. من الكفر .. من الافتراء .. العالم كفرت .. الناس افترت .. شوف الستات ما شيين ازاي في الشوارع .. نص جسمهم عريان .. شوفوا الافلام .. الافلام كلها بوس .. ومش عاوزين ربنا يفرقنا .. ؟ ده ربنا يحرقنا كمان .. (يلتفت لزملائه) .. وانا ايه اللي يقعدنى هنا في وسط الكفر والضلال ؟ .. انا راجل مش حاعيش قد اللي عشته .. انا ارواح اموت جنب قبر رسول الله .. (يخرج من مكانه متجها للخارج وقد اتتأبته نوبة اقرب للهديان) .. اتاجى لك يا حبيبي .. جاي لك .. يا حبيبي .
- نوح :** (بحزم شديد) .. اقعد مكانك يا استاذ .. اقعد مكانك .. (للجميع) .. انتم بالذات ممنوع حد فيكم يخرج بره البلد ..
- مدير الاوقاف :** (هادئا ومتمالكا لنفسه تماما) .. معنى ايه ممنوع نخرج بره البلد ... انا مواطن ربي زيك يا استاذ .. ومن حقى دستوزيا انى اخرج وقت ما انا عاوز ...
- نوح :** الظاهر انه كان يجب اقول لكم حاجة مهمة .. انا عندى كل الصلاحيات في المحافظة بما فيها اعدام اى حد .. و دلوقت اتفضل اقعد ..
- (مدير الاوقاف يجلس مصموتا)
- مدير الصحة :** (يحاول ان يبدو وقيقا وهادئا) .. الواقع مسالة الخروج دى ، في حاجة لاعادة نظر ..

يعنى مثلا .. انا مرتبط بموعد .. بكره
 الصبح فى لندن . وحارجع مصر تانى فى
 نفس اليوم .. (نوح ينظر له بحدة ، فتبدأ
 الكلمات تموت على شفثيه) .. الساعة حذاشر
 بالكثير .. او ممكن أرجع بطيارة المغرب ..
 حارجع آخر النهار .. والله العظيم ..
 ومستعد أحلف لك على .. يعنى .. حضرتك
 .. انا آسف ..

توحيد : أستاذ نوح انا آسف للمظهر اللي بيبدو بيه
 بعض الحاضرين .. لكن أرجوك .. كمن ..
 اللى فات من كلامك هو الجزء المؤلم ..
 ولكن الخطير والمهم .. هو .. حانعمل ايه
 .. ؟ .. ماذا سنفعل لانقاذ الوادى .
 (لحظة ستمت .. ثم يبدأ نوح فى الكلام)

نوح : لقد بحثت المسألة على كافة المستويات ، فى
 سرية كاملة .. وأخيرا تم وضع خطة شاملة
 لانقاذ كل محافظة على حدة .. والخطة
 الخاصة بانقاذ محافظة مصر .. اطلق عليها
 « عملية نوح » .. وأنا المسئول عن تنفيذها
 .. وقبل أن ندخل فى تفاصيل الخطة .. أود
 أن اشرح لكم الاساس النظرى الذى بنيت
 عليه الخطة ... بما انه لا يمكن عمليا انقاذ
 كل الناس .. لذلك فقد اتفق على انقاذ
 روح مصر نفسها .. وبعد دراسات طويلة .
 استقر الرأى أن روح مصر مركزة فى أحسن
 عناصرها .. أحسن المقول فيها ... وهى
 دى عملية نوح .. المطلوب عمل كشوف

بأسماء أحسن العناصر في البلد .. من كل زوجين اثنين .. أحسن مهندس .. أحسن مهندسة .. أحسن طبيب .. أحسن طبيبة .. أحسن مدرس .. أحسن مدرسة .. وهكذا .. في كل المهن .. في كل المجالات .. مطلوب عمل كشوف بأسماء عشرة آلاف شخص .. نستطيع أن نقول عنهم ، هؤلاء هم روح مصر .. (يتوقف لحظة) .. فيه مركب أبحاث تقف الآن .. في عرض البحر .. فوق منطقة الهزات الأرضية .. وفيها واحد من خيرة علمائنا في الارصاد .. قبل وصول الأخدود وحدث الطوفان بوقت كاف . المركب دى بتدينا أنلار .. قبلها بأربعة وعشرين ساعة .. الأنبار بيجلى على تليفون داخل هذه الحقيبة .. هذه الحقيبة لا تفارقنى ليل نهار .. (يشير داخل الحقيبة) .. فيه هنا مظروف أصفر كبير . مكتوب عليه « عملية نوح » فيه تفاصيل الخطة كاملة وفيه أوامر التشغيل لكل الجهات اللى حاشترك فى العملية .. عند حدوث الأنذار . ستنطلق عشرات الأجهزة لتحضر هؤلاء العشرة آلاف شخص ، حيث سيتم نقلهم بالطائرات والقطارات والسيارات الى الاسكندرية .. حيث يجدون فى انتظارهم ثلاثة مراكب كبيرة .. حمولة هذه المراكب عشرة آلاف شخص .. بالإضافة الى عشرة آلاف كيلو جرام من الوثائق شديدة الأهمية

.. بعد ذلك ستنتقل المراكب الى عرض
البحر ... وبعد حدوث الطوفان .. ستعود
المراكب .. لترسو في مكان معين .. غرب
ما كان يسمى بوادى النيل .. وفي الصحراء
.. سوف نبدا مرة اخرى في بناء بلدتنا ..
والآن ... المطلوب من حضراتكم الاتى ...
اولا ... السرية المطلقة .

ثانيا .. الموضوعية التامة والحياد الشديد
.. والنزاهة .. في اختيار هذه العناصر ..
ثالثا ... ان يسير كل شيء في حياتنا في مجراه
الطبيعى .. كل مشاريعنا هي هي .. كل
شيء في حياة الناس يجب ان يسير كما هو ...
لا تتصرفوا على اساس ان الفرق ينتظرنا في
النهاية .. أرجوكم ، أفهمونى .. لا تتصرفوا
على اساس ان كل شيء قد انتهى .. لان هذا
معناه ان الاهمال والفساد ، حاسود كل
حياتنا .. فاذا شعرت الناس بذلك ..
ستكون النتيجة اننا سنفرق من غير مياه ..
ومن غير طوفان .. أرجوكم .. لنعمل في كل
المجالات بجد .. بل وبجد اكثر من ذى قبل ..
والآن ايها السادة .. اى سؤال ؟ ..

مدير الاحتفالات : لو سمحت لى يافندم ..

نوح : اتفضل ..

مدير الاحتفالات : لو سمحت لى يافندم .. هو صحيح سؤالى
قد يبدو للوهلة الاولى غريب .. ولكنه في
تصورى .. شديد الأهمية .. بل وشليد

الصلة بعملية نوح العظيمة .. بعد ما بنى
البلد دي ، حانسميها ايه ؟

نوح : زى ما هو .. وزى ما كان وزى ما حايكون
.. للأيد ..

مدير الاحتفالات : انا مش قصدى المحافظة .. ما هو طبيعى
حايبقى اسمها القاهرة ... ولو ابنى باقتراح
تعديل بسيط .. انها تبقى قاهرة نوح العظيمة
.. عموما هذا الموضوع سابق لأوانه .. ولكن
سؤالى ينصب أساسا على بلادنا ككل ..
بعد ما نقلدها . ونبنيتها تانى .. حانسميها
ايه .. ؟

نوح : والله يا أخى انا مش عارف اسمها تابعكم فى
ايه ؟ .. حتى الأشياء الجميلة البسيطة اللى
فى حياتنا ، ما حدش بيجرؤ يقمر أساميتها ..
لا أحد يجرؤ على تغيير اسم الهرم وأبو الهول
.. لا أحد يجرؤ على تغيير اسم سيمفونية
مثلا .. ومع ذلك انتم أحرار .. سموها زى
ما تسموها بس نعملها فى الأول ..

مدير الاحتفالات : (يجلس) .. متشكر يا فندم .. والله العظيم
هو ده رأيى من الأول وطول عمرى باقول
لهم كده ..

(مدير الخزنة العمومية يقف)

مدير الخزنة : فيه ناس مش موظفين فى المحافظة .. وفيه
متعنين على مكافآت .. وفيه ناس على درجات
.. بس لم يشملهم التقييم الجديد .. وفيه
ناس معارين لمحافظة أخرى .. وفيه ناس
تبع المحافظة .. بس ساكنين فى الدقى

والعجوزة .. يعنى فى زمام محافظة الجيزة
.. حانتصرف معاهم ازاي ؟

(مجلس)

: وفيه ناس مفصولين من الاتحاد الاشتراكي ..
ناس معزولين .. وناس مستبعدين .. حايكون
موقفنا منهم ايه .. ؟

: انا كلامى واضح جدا .. المطلوب هو احسن
العناصر فى البلد ..

: تسمح لى يافندم ..

: اتفضل ..

: الأساس النظرى لعملية نوح .. أساس
خاطيء .. أيضا شرعية العملية منعدمة ..

والعملية كلها .. بالرغم انها براءة .. الا انها
رومانسية .. بعيدة عن الواقع .. ويتأخذ من

الماضى اكثر مما تستوحى المستقبل ..
العملية كلها لا تعدو أن تكون تنفيذ عصرى

لعملية سيدنا نوح القديمة .. وهذا شيء
شديد الرومانسية والسذاجة .. عملية بها

من حسن النوايا .. أكثر مما بها من العلم ..
: أستاذ توحيد .. من غير خطابة .. العملية

غلط ليه .. ؟

: روح مصر لا تعنى احسن عناصرها .. روح
مصر تعنى المصريين .. المصريين كلهم .. ده

الاساس النظرى السليم .. أما من ناحية
الشرعية .. ما حدث له الحق فى الوصاية على

حد .. كل واحد فينا ، يمتلك قدر من
الأرض مساوى لزميله .. يمتلك قدر من الهواء

مساوى لزميله ..

مدير الاعلام

نوح

توحيد

نوح

توحيد

نوح

توحيد

نوح : يعنى ايه .. ؟
توحيد : يعنى ليس من حق احد .. اى احد ، ان يخفى اى حقيقة عن الناس .- اذا كان كل مواطن معرض لقدر من احتمالات الفرق فمن حقه ان يتمتع ايضا بقدر من احتمالات الانقاذ .. معنى هذا . انه يجب عرض هذه الحقيقة فورا على مجلس الشعب .. وعلى الناس .. بكل وسائل الاعلام ..

نوح : برضه فكرنا فى ده يا استاذ توحيد .. عندنا برضه ناس خياليين زيك . كانوا بيطالبوا بكده .. ولكن ماذا ستكون النتيجة .. ؟ ..
 اقصى درجات اللدع .. انهيار المعاملات المالية .. انهيار كل شئ ..

توحيد : هو ده الخطأ .. اننا نتصور دايمًا ان الناس لسه ما بلغت سن الرشد .. واننا اوصياء عليهم ...

نوح : استاذ توحيد .. بلاش ندخل فى مهارات .. اذا عندك جديد قوله .. دى خطتى .. اذا كان عندك خطة ثانية .. اتفضل اعرضها ..
 : عندى ..

نوح : اتفضل .. تعالى اقف مكانى ..

(نوح وتوحيد يتبادلان مكانهما .. توحيد الآن يقف على المنصة .. ويبدأ فى شرح خطته بحماس شديد بإشارات من يده على الخريطة)

توحيد : عظمة اى شعب تنبع من قدرته على تحقيق

أشياء تبدو خالية .. ولكن أوكد لكم أنها الخطئة
 الوحيدة الواقعية والواجبة التنفيذ .. احناليه
 نستنتى لما نفرق .. احنا نبدأ من دلوقت ..
 من اللحظة دى .. لماذا نتحرك غرب
 النيل .. ؟ .. لماذا لا نتحرك شرق
 النيل .. ؟ .. مش سكان القاهرة فقط ..
 سكان كل المدن .. المسافة بيننا وبين قناة
 السويس . مائة وعشرين كيلو .. نمشيهم ..
 وبعد ما نعدى قناة السويس .. نبدأ من جديد
 فى أرضنا ..

(تثناثر الطليقات)

: ده بينادى بالحرب ..

: ده عاوزنا نروح فى داهية ..

: رزل .. مش قلت لك ..

: ظروف المعركة حاليا مش مهيأة .. والحصون

اللى العدو عاملها على القناة تجعل من الصعب ..

بل من المستحيل فى الظروف الحالية ..

: (مقاطعا) .. أنا ما تكلمتش عن الحرب ..

كمان ما بفهمش فيها .. لكن بافهم فى النيس

كويس .. لا قوة فى الوجود تستطيع

الوقوف فى وجه شعب بأكمله .. الشعب

كله .. بنسائه وأطفاله .. يمشى على الأقدام

فى اتجاه المنطقة دى (يشير لسيناء) ..

يحمل مواد البناء .. هى دى شرعية العملية

ياجماعة .. أن الشعب بيتحرك بعيدا عن

الخطر .. من أرضه .. لأرضه .. لا لشيء إلا

لكى يبنى نفسه من جديد .. وأوكد لكم اننا

....

....

....

مدير الدفاع

توحيد

في الحالة دي .. حانتحرك في حماية أصحاب
 الضمائر في العالم كله .. لا شيء في التاريخ
 جدير بالاحترام مثل شعب بناضل من أجل
 بقائه .. ومها كانت الخسائر في العملية دي ..
 الا انها لن تكون في حجم خسائر « عملية
 نوح » .. التي أشك اصلا في امكانية
 تنفيذها .. أشكركم ..

(يترك المنصة ويجلس .. ينفض نوح)

نوح

: أخ توحيد .. مع احترامى الشديد ولوجهة نظرك
 .. الا انى لست هنا من أجل مناقشة خطط
 جديدة .. انا هنا من أجل تنفيذ « عملية
 نوح » .. (يضع يده على الكتابيين المقدسين
 والسدس) .. والآن أيها السادة .. سوف
 تقسم جميعا ..

توحيد

: (منفلا) .. انا حالف معاكم .. وحابدل
 كل جهدى من أجل انجاح « عملية نوح » ..
 ولكنى .. وأرجو من الأخ سكرتير الجلسة انه
 يثبت تحفظاتى .. لست مؤمنا بشرعية هذه
 العملية .. كما انى أيضا ، لا ائق في
 نجاحها ..

(توحيد يتجه للمنصة ويضع يده فوق يد نوح ،
 الموجودون يتبعونه ، تحتفى إضاءة المسرح بالترديد)

* * *

المشهد الثاني

(على سطح مركب الأبحاث . نوح مستنداً إلى السياج ،
يحقق في البحر . . بجواره مائدة صغيرة وثلاثة مقاعد . .
المكان غارق في أشعة الشمس ، تدخل فاطمة تحمل بين
يديها صينية عليها أدوات الشاي)

نوح : متشكر يادكتورة فاطمة . . الواقع أنا باتعبكم
لما باجى . .
فاطمة : بالعكس . . أنا دايما باعمل الشاي للدكتور في
الميعاد ده . .
نوح : هو فين دلوقت ؟
فاطمة : أنا وديت له الشاي في المعمل تحت . . حايبجى
بعد شوية . .
نوح : فيه حاجة مهمة . . ؟
فاطمة : أبدا . . مرور عادى . .
(تصب له الشاي)

نوح : بتشتغلي معاه بقى لك كتير . . ؟
فاطمة : أنا كنت تلميذته . . ولما اتخرجت . اشتغلت
معاه . . أنا باشتغل معاه من عشر سنين . .
نوح : مبسوطه من الحياة دى . . ؟
فاطمة : جدا . . أنا ماليش حد . . اخواتي كلهم
اتجوزوا . . والدى ووالدتي توفوا من
زمان . . أنا ماليش حاجة في الدنيا غير

شغلى .. ومن حسن حظى انى باحب البحر ..
 البحر يبشعر الانسان بالسلام الحقيقى .. نوع
 من الهدوء الرقيق يخليك تشعر بجمال كل
 شىء .. وده شىء مهم جدا .. خاصة فى
 انتظار .. (تتردد) .. فى انتظار .. على
 العموم .. ما بنحسش هنا بالملل .. المركب
 نصها معمل ونصها مكتبة .. الدكتور كان
 جايب كل مكتيته الموسيقية ..

فاطمة .. انت قلت فى انتظار .. وما كملتش

نوح

الجملة .. فى انتظار آيه .. ؟

فاطمة : فى انتظار النهاية .. أنا مشتركة مع الدكتور

فاطمة

فى رصد الظاهرة دى من ست سنين تقريبا ..

نوح : يعنى عارفة كل حاجة .. ؟

نوح

فاطمة : قبل انت ماتعرف ..

فاطمة

نوح : ومع ذلك مش باين عليكى أى احساسات

نوح

بالفزع ..

فاطمة : فى الاول حسيت بالرعب .. لكن بعد كده

فاطمة

بدأت أحس بالهدوء .. بل وبدأت أمتع

بحياتى أكثر من الأول .. أسطوانات ما كنتش

سمعتها .. باسمها .. كتب ما كنتش

قريتها .. باقراها .. اكتشفت أن أهم شىء

فى حياة الانسان .. أنه يبقى له دور .. ودور

مهم للآخرين .. أخيرا اكتشفت أنا عايشة

ليه .. ؟

نوح : ليه .. ؟

نوح

فاطمة : الانذار اللى حاوصل لك على التلفون ده ..

فاطمة

(تشير للحقيقية) .. أنا مسؤولة عنه ..

الدكتور وأنا مسئولين .. يعنى أنا يتحمل
نص مسئولية التنبيه لتنفيذ « عملية نوح »
.. بأشارك فى مسئولية التنبيه لانتقاد روح
مصر .. هى دى الحاجة اللى أنا عايشة
عشانها .. وعشان كده .. أنا هادية
جدا .. مش شاعرة بأى خوف ..

: وبالبحارة اللى هنا .. ؟

نوح

فاطمة

: مش عارفين حاجة على وجه التحديد ..
بس من الواضح انهم حاسين أن فيه حاجة
خطيرة حاتحصل .. وانهم مسئولين عن
عملية كبيرة ..

: وعرفتى ده ازاي .. ؟

نوح

فاطمة

من سلوكهم .. هاديين جدا .. ما حدش
منهم بيفكر ياخذ أجازة ويسيب المركب ..
هم بيتقوا جدا فى الدكتور .. وببشغلوا معاه
من سنوات طويلة ..

: تفكرى يا فاطمة .. لو الناس كلها عرفت ..

نوح

لو قلنا لهم الحقيقة .. حايبقى سلوكهم ،
هو نفس سلوك البحارة اللى هنا .. ؟

: مش أنا اللى أجاب على السؤال ده .. لأنى

فاطمة

ماشغلتش فى السياسة قبل كده .. انت
اللى تجاوب ..

: ما انت عارفة يا فاطمة .. سنوات طويلة

نوح

والقيادة بتفكر بالنيابة عن الناس .. كل
القرارات بتنزل من فوق .. فلما نيجى فى
الآخر ونقول لهم الحكاية دى .. يبقى
جنون ..

- فاطمة : فعلا .. يبقى جنون .. لازم يعرفوا دورهم
 حايبقى ايه .. لو عرفوا المطلوب منهم
 حاتختلف النتيجة .. (فحاجة) .. وبعدين ..
 انت كل ما تيجى تتكلم فى الناس والسياسة ..
 ما تكلمنى عن البحر يا أخى .. كلمنى عن
 الشمس كلمنى عن نفسك .. نوح ..
- نوح : آيوه ..
 فاطمة : انت مين ؟ ..
 نوح : ماعرفش .. مفيش حاجات مؤكدة باعرفها
 عن نفسى .. الشئ المؤكد انى باحب اشوفك
 .. باحب أقعد معاكى ..
- فاطمة : ده غزل .. ؟
 نوح : صدقيني .. مرة فكرت ان حد غيرى يتحمل
 مسئولية العملية ..
- فاطمة : وانت .. ؟
 نوح : آجى هنا .. أقعد معاكى للأبد ..
 فاطمة : (تضحك بصفاة) .. عموما الابد مش بعيد
 قوى .. جايز يكون بكره .. جايز يكون
 بعده .. جايز يكون بعد ثوانى ..
 (يقترب الدكتور الجيولوجى .. فى حوالى السبعين أشيب
 الشعر .. هادى ، يتكلم بتؤدة ورقة)
- الدكتور : أقول ايه ؟ .. آسف عشان اتاخرت عليكم
 .. والا آسف عشان ازعجتكم .. ؟
 نوح : أهلا يا دكتور ..
 (الدكتور يلتفت لفاطمة وهو يجلس)
- الدكتور : من فضلك يا فاطمة .. هاتى لى آخر قراءات
 من تحت ..

- فاطمة . : حاضر .. حانكامل كلامنا بعدين يا نوح
(تخرج ، الدكتور يدخن البايب وهو يحلق في البحر)
- الدكتور : البحر جميل النهاردة ..
- نوح : دكتور ..
- الدكتور : أم
- نوح : دى زيارتى الاخيرة للمركب ..
- الدكتور : برضه تخليك على اتصال بى ..
- نوح : ضرورى .. (لحظة) .. دكتور احنا عملنا
كل الترتيبات اللازمة من اجل عملية الانقاذ ..
الا انى جاى اسأل حضرتك سؤال اخير ..
هل فيه احتمال ولو واحد في المليون أن كسل
اللى بنفكر فيه .. ما يحصلش ؟
- الدكتور : (يفكر للحظات) .. لا .. حايحصل ..
اسمع يا نوح .. أنا كعاللم .. ما قدرش
اسمح لنفسى انى اخدكم .. دايمًا فيه احتمال
وجود خطأ في أبحاثنا .. وفي الحالة دى
تحصل المعجزة .. لكن تبقى خيانة لوسبتكم
تخططوا في انتظار معجزة ..
(يرتشف الشاي ويدخن وهو ينظر للبحر في استمتاع زائد)
- الدكتور : لسه ما أدركتش الجانب المشرق في الحكاية
دى .. ؟
- نوح : مشرق ! .. حضرتك بتقول مشرق يا
دكتور .. ؟ ..
- الدكتور : مش مشرق وبس .. ده عظيم كمان ..
التاريخ طول عمره بيقول أن مصر هبة النيل ..

لأول مرة في التاريخ .. حاتبقى بلدنا من
صنعنا احنا .. شىء عظيم لما تبقى مصر ..
هبة المصريين ..

: والملايين اللي حايموتوا .. ؟

نوح

: كانوا حايموتوا بشكل أو آخر .. مفيش حد
بيعيش للأبد .. (لحفظة) .. اللنش حايوصل
امتى ؟ ..

الدكتور

: (ينظر في ساعته) .. بعد دقائق ..

نوح

: فاطمة حاتنزل معاك مصر ..

الدكتور

: عندها اجازة .. ؟ ..

نوح

: دورها معايا انتهى .. كفاية عليها كده .. البنت
دى عمرها ما تمتعت بحياتها ..

الدكتور

: (بهراوة) .. متأخر قوى يا دكتور .. متأخر
قوى .. ياريت كنا اتقابلنا في ظروف ثانية ..
دايما فيه وقت للحب .. خصوصاً في ظل
الخطر ..

نوح

الدكتور

: ما اعتقدش اتى حاقدر أسعدها ..

نوح

: عموماً السعادة شىء مش مطلوب في الفترة
دى ..

الدكتور

(تظهر فاطمة ، تحمل ورقة صغيرة تضمها أمام الدكتور)

: (يحقق في الورقة باكتئاب) .. فاطمة ..

الدكتور

: حاتنزل مصر دلوقت .. حضرى شنطتك ..
مامورية ؟ ..

فاطمة

: أيوه ..

الدكتور

: كام يوم .. ؟

فاطمة

- الدكتور : ما عرفش .. دورك هنا خلص .. الباقي على
أنا ..
- فاطمة : (تدرك فرضه) .. دكتور أنا مش حاسيب
المركب ..
- الدكتور : من فضلك انزلى حضرى شنطتك .. (صوت
اقتراب اللنش) .. اللنش وصل ..
- فاطمة : مش حاسيب المركب يا دكتور ..
- الدكتور : (بهجفاف) .. دكتورة .. ما تخلينش اعمالك
بطريقة رسمية .. (يخرج من جيبه ورفقتين)
.. ده جواب بانتدابك للتدريس فى جامعة
القاهرة .. واذا رفضتى ... يبقى ده جواب
بفصلك ..
- (تهادق فيه لحظة ثم ترمى عليه تعاقبه ، يملو صوت اقتراب
اللنش .. تحفت الإنفاة)



المشهد الثالث

(قاعة المجلس الشعبي . نوح يدخل ومعه حقيبته وملف كبير ، يفتح الملف ويقلب فيه بثوتر خفيف ، تتصاعد حصيلته ، يحاول قدر استطاعته أن يتمسك بهدوئه . . . يدخل توحيده حاملا بعض اللوحات الورقية)

: أهلا يا توحيد . . . أخبارك آية . . . ؟

نوح

(توحيد يفرده أوراقه)

توحيد

: ده تصميم مبدئي للبلد . . أرجو تستعينوا بيه وانتم بتشتغلوا . . زى مانت شايف . . أهم شئ فيها ، المصانع والطرق . . دى طرق تربطنا بأفريقيا . . كل أفريقيا . . ودى تربطنا بآسيا . . وكل المنطقة العربية ، ودى ممتدة لأوروبا . . ودول عدة ضواحي صغيرة . . للمفكرين والعلماء والفنانين . . ودى مدينة صغيرة خاصة بالأطفال . .

: عملت حساب كام سنة . . ؟

نوح

: ألف سنة لقدام . . ولذلك تلاقى هنا أماكن للمليون مصنع ، ألف مسرح . . خمسة آلاف دار سينما . .

توحيد

(يخرج أوراقا أخرى)

. . تلاحظ أن كل مبنى حجمه كبير . . . وجميل في الوقت نفسه . . . مبنى واحد

- ما عملتش تصميمه .. (نوح ينظر له
بتساؤل) .. السجن .
- نوح
توحيد : تفكر مش حاجتاجه .. ؟
- نوح
توحيد : حاجتاجوه طبعا .. السؤال ... حانطوافيه
مين ؟ .. وبناء على الاجابة .. يتعمل
التصميم .. وعلى كل حال .. مش حاعمل
له تصميم .. اى حد تانى يعمله ..
- نوح
توحيد : الجماعة اشتغلوا بسرعة البرق .. احسن
عشرة آلاف واحد فى البلد .. اختاروهم فى
جمعة ..
- نوح
توحيد : ايوه ..
- نوح
توحيد : عارف انك مش فيهم ..
- نوح
توحيد : انا مش احسن مهندس معمارى فى البلد ..
- نوح
توحيد : جايز يا توحيد .. بس من المؤكد ، انك
اكترهم اخلاصا ..
- نوح
توحيد : متشكر جدا .. انا كل اللى باطلبه .. تعملوا
حساب صندوق وزنه عشرة كيلو جرام ..
حاحط فيه الرسومات والتصميمات ..
يمكن تنفعكم .. وبرضه يا استاذ نوح .. انا
لازلت باطلب من حضرتك اعادة النظر فى
« عملية نوح » ..
- نوح
توحيد : (بفضب خفيف) .. انا مش حاسالكلم فى
الووضوع ده تانى يا توحيد ..
- نوح
توحيد : (تدخل المخبومة .. يتخلون اماكنهم)
- نوح
توحيد : ايها السادة .. اشكر لكم جهدكم فى اعداد
الكشوف ، فى هذا الوقت القصير ..
(يتصفح الملف بسرعة) .. لكن .. بعد نظرة

سريعة للاسماء ، بنكتشف ان احسن مهندس
معمارى فى البلد .. هو الدكتور فلان الفلانى
مدير الاسكان .. احسن طبيب هو الدكتور
فلان الفلانى مدير المنطقة الطبية .. احسن
مدرس هو الاستاذ فلان الفلانى مدير التربية
والتعليم .. احسن ظابط شرطة هو اللواء
فلان الفلانى مدير الامن .. احسن عالم
دينى هو السيد فلان الفلانى مدير الاوقاف ..
اكبر اقتصادى هو السيد مدير الخزنة ..
الى آخره .. يعنى حضراتكم ... احسن
ناس فى البلد ..

: مدير الثقافة
: نوح
: مدير الخزنة
: مدير التعليم
: نوح
: امبارح مش مسئول عن اللى بيعمله غيرى ..
بكره ..

: نفهم من كده .. ان حضرتك بتظعن فى
كفاءتنا ..
: مدير الاسكان
: مدير الاوقاف
: مدير التكوين
: نوح
: مانتهم عاملينها دلوقت ..

مدير التعليم : الله .. ده حايهاجم .. اذا كان فيه قصور
في بعض النواحي .. فده راجع لقلّة
الإمكانيات ..

مدير الإسكان : والانفجار السكاني .. لكن انشاء الله .. لا
نيجي نعملها تاني .. حانشتغل على رواقه ..

مدير التكوين : يا جماعة الأستاذ نوح بيلف ويدور عشان
يتهمنا بعدم النزاهة ..

نوح : أنا ما جيبتش سيرة النزاهة .. لكن ما دتم
مصرين تتكلموا فيها .. أناليه سؤال ..
أنا عاوز أعرف .. الأستاذ مدير الاحتفالات
.. اسمه محطوط في الكشوف ليه .. ؟ ..
دوره حا يكون أبه انشاء الله .. ؟

مدير الاحتفالات : (يقف) .. انشاء الله يافندم .. بعد ما
تنزلوا من المراكب . وتيجوا تبنوا البلد ..
مش محتاجين حد يحتفل بيكم .. ؟

نوح : قصدك يطبل ويرمر .. لا .. المرة دي
حانشتغل من غير طبل .. ومن غير زمر ..

مدير الاحتفالات : اللي تشوفه يافندم .. هو أنا اكراهه .. هو
إننا اكراهه أن احنا نشتغل من غير طبل ومن غير
زمر .. والله العظيم هو ده كان رأيي طول
عمرى .. وأعلنته في أشد العهود ظلمة ..
وخصوصا أيام مراكز القوى .. أيام ما
كانوا ..

نوح : (مقاطعا) .. عزيزى انفضل أقعد .. ومادام

حضراتكم أحسن ناس في البلد .. المهندس
توحيد اسمه مش موجود في الكشوف ليه .. ؟

مدير الخزنة : القاعدة اللي حطيناها .. اننا ناخذ درجات
الإدارة العليا .. مش معقول يبقى عندنا مدير
عام . اللي هو السيد مدير الإسكان ..
ونسبته وناخذ الأخ توحيد اللي لسه فئة
خامسة ..

نوح : معقول .. (يتصفح الملف) .. كلامك معقول
منطقي .. عندك حق .. فيه ملحوظة ثانية ..
هي البلد اللي حاتمصل دي .. مش حايبقى
لها عقل .. ؟ .. عقلها فين .. ؟ .. فين
أحسن كاتب .. فين أحسن شاعر .. مقيش
رسام .. ؟ .. مقيش نجات .. ؟ ..

مدير الإعلام : مدير الإسكان بيكتب شعر .. ومدير التموين
بيكتب مسرحيات .. ومدير الصحة يعرف
يكتب لك عشر قصص في ليله ..

مدير المواصلات : وأنا أعرف أرسم بالزيت .. والتماثيل اللي في
الحوش دي أنا اللي عاملها .

مدير الخزنة : حانجيب ناس من الخارج ليه .. ؟ .. هي
زيادة عدد .. ؟ .. الحق علينا اللي بنوفر لك
أماكن ..

مدير الأوقاف : .. يا جماعة واضح أن الأستاذ نوح يشك في
ذمتنا .. ولذلك احنا نسحب الكشوف ..
ونسبته ينقى بنفسه ...

نوح : عاوزين تحطو زهرى للحيطه .. عشان
أختارهم لوحدى محتاج خمس سنين على
الاقل .. اسمعوا يا جماعة .. مبدئيا ،
أنا موافق على الكشوف دى ...

توحيد (يقف مقاطعا بعصية) ... مادام حضرنك
موافق مبدئيا .. يبقى أنا باطلب منك انك
تسجل فى محضر الجلسة .. أن عملية نوح
التي بدأت من أجل انقاذ روح مصر ..
تتحول الآن لتصبح عملية انقاذ الموظفين ...

نوح : (يرتفع صوته هو الآخر) ... ما تقاطعنيش
يا توحيد .. استنى لما اخلص كلامى ..
(بهدوء) .. مبدئيا .. أنا موافق على
الكشوف دى .. وبأعلن فى الوقت نفسه حل
المجلس ... وبعد ستين يوم .. حاتحصل
انتخابات جديدة .. لاختيار أعضاء جدد
للمجلس ..

(نوح وتوحيد يتبادلان نظرات سادة ... يبطه
شديد .. تزل ..)

الستار

الفصل الثامن

الشهد الأول

(مكتب نوح في المحافظة ، نوح وفاطمة ... ، مظهر
نوح يدل على أنه يعمل منذ وقت طويل، يتناول وجبة
غذاء خفيفة ، فاطمة تراجع بعض الأوراق بسرمة
ثم ترفع سماعة التليفون)

: الو .. مكتب الأستاذ نوح في محافظة مصر ...
من فضلك ممكن اكلم الدكتور حسن ...
(نوح يرقب المكالمات باهتمام)

فاطمة

... طب ادينى المدام لو سمحت ...
: مش موجود هو راخر .. ؟
: الو .. صباح الخير يا مدام .. يا ترى
الدكتور حسن حيا يرجع امتى .. ؟
(تسمع فى صمت واكتئاب خفيف)

نوح

فاطمة

.. متشكرة يا مدام .. مع السلامة ..
(تضع السماعة) .. فى اليونان .. بيشرف
على بناء قرى نموذجية ..

: (باستياء يشويه التوتر) .. أحسن مهندس
معمارى فى مصر بينى قرى فى اليونان ..
احسن عالم فى البترول . بيشغل فى أمريكا
.. أحسن قانونى مش عارف منتدب فىين ..
.. أحسن عالم ذرة .. سافر هو راخر ..
الظاهر فيه قوة طاردة مركزية .. والغريب

نوح

أن القوة دى ما بتطردهش الا الكويسين
.. بس ..

(فاطمة تدير قرص التليفون)

بتطلبى مين ؟ ..
: (تلقى نظرة سريعة على كشف في يدها) ..
الدكتور عبد الرحمن .. الو .. صباح الخير
.. مكتب الأستاذ نوح في محافظة مصر ..
.. ممكن اكلم الدكتور والله .. ؟ .. (لحظة) ..
حضرتك المدام .. ؟ .. (تستمع اليه طويلا
.. يبدو على وجهها انفعال الدهشة المصحوب
بالانزعاج) .. عمل حاجة معينة ؟ .. محاضرة ؟
.. على كل حال يا مدام ما تنزعجيش ...
قطعا المسألة حانتتهى على خير ... وبسرعة
انشا الله ، قلبى معاكى يا مدام .. مع ألف
سلامة .

(تضع الساعة ببطء وانكسار)

... دى اخته ... هو فى بلد عربى ..

: فى الجامعة ؟

: فى السجن ... راح اشتغل أستاذ فلسفة ..
الظاهر قال محاضرة ما عجبتهمش ..

هو ده يستحيل حاجة .. ده عنده سبعين سنة
.. سبعين سنة وسبعين كتاب .. (يضحك
بمرارة) .. فى السجن .. قطعا فى أول ربيع
ساعة حابنسوه كل الفلسفة اللى عرفها فى
سبعين سنة .. (يستمر فى الضحك باستمتاع
.. زوجته تنظر له بهدوء) ..

نوح
فاطمة

نوح
فاطمة

نوح

- فاطمة : نوح ... حان روح دلوقت ..
- نوح : لسه قدامنا شغل ... اتصلى بالباقيين .
- فاطمة : انا اتصلت بخمستاشر .. وطلعوا مش موجودين .. لسه فى الكشف خمس أسماء ... ما عندهم ش تليفونات ..
- نوح : نروح لهم بيوتهم ..
- فاطمة : اشمعنى يعنى الخمسة دول هم اللى حايكونوا موجودين ؟ نوح انت ما نمتش من امبارح ...
- نوح : حاعمل ايه يا فاطمة .. الكشف دى انا وافقت عليها .. (يشير لمجموعة أوراق على المكتب) .. لكن مش مقتنع بالأسماء اللى فيها .. لازم ادور بنفسى عن العناصر الكويسة ..
- فاطمة : شهر كامل لحد ما عرفت عشرين اسم .. طلع منهم خمستاشر مسافرين .. ما تقدرش تشتغل لو احداك .. لازم تعتمد على أعضاء المجلس ..
- نوح : (يشير للكشوف) .. ده اللى عمله أعضاء المجلس ..
- فاطمة : انا بتاتكلم عن المجلس الجديد .. مش الانتخابات النهاردة .. ؟
- نوح : ايوه .. والنتيجة حاتطلع النهاردة .. وفيه اجتماع الساعة ثمانية بالليل ..
- فاطمة : بالتأكيد العناصر الجديدة فى المجلس حاتعمل كشوف ممكن تعطن لها .
- نوح : الوقت يسرقنا .. لسه حاستنى لحد ما يعملوا كشوف جديدة ؟ ... افرضى الكارثة حصلت فى اى لحظة ..

- فاطمة : نشستفل على الكشوف اللى مصائبه .. هو ده
الممكن .. غير كده مستحيل .
- نوح : المطلوب عمل الاستحيل يا فاطمة ..
- فاطمة : .. المطلوب دلوقت انك تنام ساعتين .. عشان
تبقى فايق لجلسة بالليل ..
- نوح : حنام على الكتبة دى ..
- فاطمة : اذا كنت تقدر تستحمل .. انا ما قدرش ..
- انا حاروح .. الدكتور قال لى .. لازم
استريح ..
- نوح : (لحظة) .. ما قلتليش انك رحى للدكتور
امبارح ..
- فاطمة : (بتردد خفيف) .. ما جانش مناسبة ..
- نوح : ما لك يا فاطمة .. فيه حاجة ؟
- فاطمة : مش عارفة اذا كان الخبر ده يضايك والا
يفرحك .. (لحظة) ... حايبقى فيه طفل
يا نوح ..
- نوح : (مدهولا . رنة النفس واضحة فى صوته) ..
مش ده اتفاقنا ..
- فاطمة : مش دى القضية .. القضية ان حايبقى فيه
طفل ..
- نوح : دى جريمة ...
- فاطمة : ان يبقى لنا طفل .. ؟
- نوح : انت عارفة ظروفنا يا فاطمة .. وعارفة انه
شئ مستحيل .. ان احنا نعرف نعتنى بطفل
.. انا مش حاطلع المركب الا آخر واحد ...
لحد ما اطمن ان عملية الانتقال تمت بنجاح ..
وممكن ما يتمش اتقاذا احنا الاثنين ..

حاهتم بالعملية .. والا اهتم بيكى ويطفلك ؟
.. ليه يا فاطمة ؟ .. ليه نزود عدد العرقى
واحد .. ؟

فاطمة : أنا حاهتم بيه .. ده ابنى وأنا مسؤولة عنه ..
نوح : واطفال الآخرين .. ؟
فاطمة : ده قدرهم ..
نوح : وهو قدره أنه يمشى ... لأن ابوه مسؤل ..

لأن ابوه وأمه يعرفوا ينقلوه .. مش كده ؟ ..
لأنه حايولد ممتاز .. ممتاز عن اطفال
الآخرين ... مش كده ؟ .. اطفال الآخرين
الى حايولدوا معاه فى نفس اللحظة .. دى
جريمة يا فاطمة ..

فاطمة : جريمة أبشع أنك تطلب منى أتخلص منه ...
نوح : مش حايحصل .. (بيدو أنه يعانى بشمة) ..
مش حاطلب منك أنك تتخلصى منه .. أنا
كمان انسان يا فاطمة .. انسان ملىان ضعف
.. ويبدو أن مسؤلىتى اكبر من قدرتى ..
ليه يا فاطمة تعملى كده ؟ ..

فاطمة : نوح يا حبيبي .. أنا من رأى تاخذ مهدى ..
وتنام ..

نوح : أنام .. ؟ ه .. فعلا .. ما ليش حق الوهم
.. ما ليش حق اليوم أعضاء المجلس لما حطوا
نفسهم فى الكشوف ..
(فاطمة تمرص على أن تكون هادئة طوال المشهد بينما
يزداد توتره)

فاطمة : ممكن تحصل معجزة يا نوح .. تحصل معجزة والكارثة اللي بنسناها ، ما تحصلش ..

نوح : انت اللي تقولى الكلام ده .. ؟ .. الدكتوراه فى العلوم .. ؟ .. مين اللي بيتكلم دلوقت .. فاطمة . الدكتوراه فى العلوم .. والا فاطمة الأم ؟ ..

فاطمة : علوم ؟ .. ايه اللي نعرفه يا نوح .. ؟ .. كل اللي نعرفه .. قشرة . قشرة رقيقة جدا فى جندار المعرفة .. يثبقى ايماننا .. ايماننا ان بكرة حايبقى اجمل من النهاردة ..

نوح : واذا حصلت المعجزة دى .. حازبيه ازاي ؟ .. حايبقى ايه فى مجتمع عايش وجواه عار الهزيمة .. وعدو .. على بعد خطوات منا .. بيهددنا كل لحظة .. وكلام دائم عن معركة وهميه مش حاتحصل ..

فاطمة : ابننا حازبيه كويس .. نوح : مش احنا اللي حازبيه .. حايتربى فى حجر التلفزيون والراديو والسينما والصحافة .. الحاجات دى كلها حاتعاون وتربيه .. يا اما تطلعه حمار .. يا اما تطلعه نمر .. يا اما يبقى تعلق .. ثعبان ..

فاطمة : البيت اهم من ده كله .. حانعمل منه انسان .. واقسان كويس قوى .

نوح : انسان كويس قوى . وبهاجر .. مش كده .. ؟ فاطمة : نوح .. انت محتاج ترتاح .. انت مصاب بحالة اكتئاب شديدة .. نظرتك بقت سوداوية جدا ..

- نوح : حالة اكتئاب شديدة . . . ؟ .. أرجو ما
 طلعتش مجنون في الآخر ..
- فاطمة : انت مش في حالة عادية .. ما بتنامش ..
- نوح : اقري الكشوف دى وحاولى تنامى .. ورينى
 حاتعرفى تنامى ازاي .. ولما ادور بنفسى
 على الناس الكويسين اكتشف انهم مشيوا ..
- فاطمة : مش مشكلة .. لوحسوا في اى لحظة ان
 البلد عاوزاهم .. حاييجوا فوراً ..
 (نخرج من مكان ما ... عنده صغيرة ... ومفرش
 كبير ... تضمها على الكنبه ..)
- فاطمة : أنا حاسبك تنام ..
 (صوت طرق خفيف على الباب)
- نوح : أدخل ...
 (يدخل توحيد ومعه دوسيه ملء بالأوراق)
- نوح : أهلا يا توحيد ... تعالى لما أعرفك بالمدام ..
 .. الدكتورة فاطمة .. المهندس توحيد ..
 (يضافها .. توحيد ينظر له يتسائل)
- نوح : عارفة كل حاجة .. بحكم وظيفتها .. مش
 لأنها مرانى .. تقدر تتكلم قدامها .. توحيد
 ده يا فاطمة معروف في المجلس أنه رزل
 جدا ..
- فاطمة : ... أهلا وسهلاً ..
- نوح : ومع ذلك باحبه جدا .. ليه .. مش
 عارف ..
- توحيد : السبب واضح جدا .. لانى رزل ..

- فاطمة**
توحيد
- : فعلا .. واضح جدا ..
: لو المجتمع كله تحول لناس ظرفاء .. يبقى
مجتمع ميت .. لا بد يكون فيه مجموعة أفراد
رذلين .. يقولوا .. لا .. وليه .. وفيه
.. ومين .. وكام ..
- : اخبار الانتخابات ايه ؟
: النتيجة حاطع الساعة ستة .. ما تخافش
على .. فيه الفين صوت في جيبى .. الادارة
الهندسية كلها بثثق في .. انا جاي لك في
موضوع تانى ..
- نوح**
توحيد
- : قطعاً حاجة رزلة ..
: فعلا .. (يفرج بعض قصاصات الصحف)
.. مهما كانت الرقابة حديدية الا ان الانسان
يقدر يكشف اى مجتمع .. من صفحة
الادب والفن .. ومن صفحة الحوادث ..
- فاطمة**
توحيد
- : فيه حاجة جديدة في صفحة الادب والفن ..
: فيه اعلانات .. اعلانات عن مبيدات خشرية ..
واعلانات عن ..
(يمد يده ببضعة قصاصات صحف)
- نوح**
توحيد
- : يارزل ... يارزل ..
: انا باتكلم جد .. ومع ذلك ده مش موضوعى
.. انا جاي اتكلم في صفحة الحوادث ..
(يمد يده بقصاصه اخرى) .. ده مؤلف
في بنك .. اختلس .. الف جنيسه ..
أربعمائة ألف جنيه ..
- فاطمة**
- : .. الف .. ؟

: أيوه ... أربعة وقدامها خمس أصفار ..

: ده حرامى .. مفترى قوى ..

: أو مجنون ..

: لا هو حرامى .. ولا هو مجنون .. ده واحد

متأكد ان اللعنة خلصت .. وان كل واحد

لازم يمد ايده .. وياخد نصيبه .. فيه

مثل بيقول ان خرب بيت أبوك .. الحق خد

لك منه قالب .. فهو مد ايده .. وخذ

قالب .. بس ما خدش قالب طوب .. خد

جدار بحاله ... (يهد يده بقصاصات

أخرى) .. دى .. حادثة ثانية .. صاج

.. حاج اتسرق من الترسانة البحرية فى

اسكندرية .. صاج يعمل مركب ، تقدر

تتصور حجمه ، لو تصورت أن فيه حد

سرق أبو الهول .. تقدر تتصور يعنى إيه

مجموعة من الناس تسرق صاج يعمل مركب ..

: وده معناه إيه ؟

: براقو يا مدام .. لو سألت ثلاثة أسئلة كمان

.. حتاخدنى لقب شخص رزل ..

: مزاجك عال قوى النهاردة ..

: جدا .. لما بتتزايد شحنة الام جوايا ..

باحس أنى شخص مرح جدا .. (يحزن ..

ويبطء) .. ده معناه ببساطة .. أن السر

اتعرف .. بص حواليك كويس .. السلوك العام

ملء باللامبالاة .. والاهمال .. والكذب ..

وده معناه أن فيه احساس عام بالنهاية ..

توحيد

نوح

فاطمة

توحيد

فاطمة

توحيد

نوح

توحيد

- فاطمة : لازم حد اتكلم ..
- توحيد : ما اعتقدش ..
- نوح : يبقى أعضاء المجلس أهملوا في شغلهم ..
فالناس اتصرفت زيهم ..
- توحيد : أعضاء المجلس ما أهملوش في شغلهم ..
هو شغلهم كده .. ما يعرفوش يقدموا
أكثر من اللي بيقدموه .. بتظلمهم لما بتطلب
منهم يشتغلوا بجد أكثر .. أوعى تصدق أن
اللي بيقيم في الصح .. يعرف يعمل الغلط ..
والحل ؟ ..
- فاطمة : حل واحد يا مدام ... (يلتفت لتوحيد) ...
- توحيد : الفى عملية نوح فوراً وفكر في مشروعى ...
- نوح : أنا طلبت منك ما تتكلمش في الحكاية دى
تانى ..
- توحيد : حاولت .. ما قدرتش .. حتى لو قطعت
لسانى ... حاتكلم واكتب على ورق
وأقدمه لك ..
- نوح : (مجتهداً) .. يا توحيد ما ترغمينش أنى أغير
طريقتى في معاملتك ..
- فاطمة : (تهديء الموقف) .. ما تعقدش المسألة يا
نوح .. (لتوحيد) أنت عندك مشروع
تانى يا باشمهندس ..
- توحيد : أبوه يا مدام .. مطلوب من كل سكان المحافظة
أنهم يمشوا على رجلهم ١٢٠ كيلو .. مائة
وعشرين كيلو .. وبعدوا قناة السويس ..
بمايه أو من غير مائة .. حانفرق لو استنينا
هنا ..
- (لحظة صمت .. يبدو عليها أنها تستوعب مشروعها جيداً)

- فاطمة : حاتحصل معركة ..
- توحيد : مش حاتخسر فيها كثير ..
- فاطمة : ... كل الناس .. ؟
- توحيد : .. كل الناس ..
- فاطمة : الرجالة .. والسيدات .. (لحظة) .. والأطفال ..
- توحيد : أيوه .. بيلمهم انفعال واحد .. قدامهم هدف واحد .. واضح .. محدد .. مسيرة .. مسيرة شايلة مواد البناء ..
- (ست للحظات يسود المرح)
- فاطمة : أنا مش عاوزة' اتسرع وأقول فكرتك عاجباني .. (تلتفت لنوح) .. لكن حقيقي يا نوح ..
- الفكرة دى جديرة بالدراسة ..
- نوح : طبعا .. ليكى حق .. ما هو انت مش بتدافعى عن البلد دلوقت .. انت بتدافعى عن طفلك ..
- فاطمة : من حقى .. ومن حق الآخرين .. (تحتد قليلا) .. انت متصور البلد أيه . مباني وشوارع ومصانع .. البلد هى طفلى وأطفال الآخرين ..
- نوح : أنا مش داخل فى مناظرة .. لتعريف كلمة بلد يعنى أيه .. أنا ما عنديش وقت للابحاث الفلسفية .. كل اللى عندى .. لا كلام فى غير عملية نوح .. ولا كلمة .. اعتبروا الموضوع منتهى ..
- (طرق عال على الباب ... مضطرب وعصبى)

نوح

: أدخل ...

(يدخل سكرتير الجلسة ... مرعوبا ، مفزوعا ...
وكان الجن كانت في أعقابها)

نوح

: فلان ..

سكرتير الجلسة : (ساقاه لا تقويان على حمله) .. أنا اتكلمت
يا أستاذ نوح .. اتكلمت (بانهيار كامل) ..
قلت كل حاجة .. اتفضل اقلنى .. يا الله ..
موتنى حالا .. والا حانتحر ..

نوح

سكرتير الجلسة : (يجلس منهارا .. يتكلم وهو يكاد يبكى) ..
أنا قلت لك من الأول .. حذرتك .. رفضت
تسمعننى .. قلت لك أنا ما عرفش احتفظ
بسر .. ولا سألت فى .. قلت لك أنا باتكلم
وأنا نايم .. مفيش فائدة ..

نوح

أهدا بس .. أهدا .. خد سيجارة ..
(يعطيه سيجارة) .. هاتى كباية ليوم
يا فاطمة ...

(فاطمة تسرع إلى ترموس صغير ، تصب منه كوب
ليمون ... وتقدمه لسكرتير الجلسة الذى يشربه دفعة
واحدة)

نوح

: ايه بقى اللى حصل بالظبط ...

سكرتير الجلسة : ولا حاجة .. اتكلمت .. مش مهم التفاصيل
.. النتيجة انى اتكلمت .. النتيجة انى
حاكون السبب فى فشل خطتك كلها ..

نوح : برضه هاووز اعرف التفاصيل .. اهدا
واحكيلي ...

(يجنّب نفسا من الميجارة ... يبدأ في امصادة رباطه
جأشه بالتدريج ...)

سكرتير الجلسة : انا كنت خايف من نقسى جدا .. كنت خايف
لا تطلع منى كلمة كده والا كده فى اى قعده ..
ولذلك بطلت قعاد على القهاوى .. قطعتم
صلتى بكل اصدقائى .. خفت احسن اتكلم
قدام مراتى .. طلقته .. قلت اسكن
بعيد عن البلد .. اسكن بعيد عن اى حد ..
(يتتابه الانفعال مرة اخرى) انت السبب
فى كده يا استاذ نوح .. انا حذرتك .. وقلت
لك بلاش انا ...

توحيد : يا عزيزى .. اهدا .. تماسك .. جايز
نصرف نتدارك المسألة .. وبعدين .

سكرتير الجلسة : مراتى خدت العيال وراحت تعيش مع ابوها ..
وانا سبت الشقة ..

فاطمة : ليه ؟ ..

سكرتير الجلسة : انا ساكن فى آخر دور .. السطوح فوق منى
على طول .. خفت حد يحط لى مايكرو فون
فوق السطوح .. يسجل لى وانا نايم .

فاطمة : المايكرو فون جايسجل لك من فوق السطوح .. ؟

سكرتير الجلسة : حصلت لواحد صاحبى .. برضه كان ساكن
فى آخر دور .. اتضح ان فيه مايكرو فونات
بتجيب على بعد ستة متر مبانى ..

نوح : طبعاً سبت الشقة .. وسكنت فى اول دور ..

- سكرتير الجلسة : لا ... سكنت تحت الأرض ..
نوح : تحت الأرض .. ؟
سكرتير الجلسة : أبوه .. لى نص فدان جنب قليبوب .. وكان
عندى قرشين .. بنيت شقة بالاسمنت
الميلح على بعد عشرة أمتار من سطح الأرض
.. أودة وصالة ودورة مياه ...
نوح : كويس قوى .. وبعدين ..
توحيد : لا .. مش كويس قوى .. سلوك زى ده
يخلي أجهزة الأمن كلها تشك فى تصرفاتك ..
المسألة كان علاجها أبسط من كده ... حتى
بالاستر صغيرة تلتزقها على بقلك . لما تيجى
تنام ..
سكرتير الجلسة : عملتها وكنت حائخنىق .. أنا عندى لحميه
.. وما عرفش اتنفس من مناخىرى .
نوح : كمل .. وبعدين ..
سكرتير الجلسة : وفى مرة وأنا مروح البيت ..
توحيد : قصدك وانت مروح الخندق ..
سكرتير الجلسة : سميه زى مانت عاوز ..
فاطمة : سيبوه يتكلم يا جماعة ..
سكرتير الجلسة : لقيت عربية شفرولية طويلة فخمة جدا ..
واقفة قدام ال ... قدام البيت وفيها واحد
افندى اتيق .. لابس نضارة سودة كبيرة ..
قال لى أهلا يا استاذ فلان .. قلت له ..
أهلا وسهلا .. قال لى أنا زميلك فى المحافظة
.. وكنت جاي من اسكندرية وقلت أحود
أشرب عندك شاي .. وأريح الموتور شوية ..
توحيد : شفته قبل كده ؟ ..

- سكرتير الجلسة : لا .. بسن قال لى إنه يعرفنى من زمان ..
 وأنه كان معايا فى الدراسة .. كان زميلى فى
 الجامعة ..
- نوح : وافتكركته ؟ ..
- سكرتير الجلسة : ... جاولت افتكركه .. لكن على آخر لحظة
 .. واحنا نازلين السلام سوا .. افتكركت
 انى ما دخلتشن الجامعة ..
- فاطمة : ده انت كنت مضطرب جدا ..
- سكرتير الجلسة : كنت خايف قوى .. يا مدام ..
- نوح : من ايه .. ؟ ..
- سكرتير الجلسة : دش من حاجة معينة يا استاذ نوح .. انا
 خايف على طول ..
- توحيد : وبعدين ..
- سكرتير الجلسة : نزل معايا .. عملت له الشاى .. قعد
 يتمشى فى الأودة .. ويبص فى الكتب اللى
 عندى .. ويبص تحت السرير .. دخل دورة
 المايه .. كان واضح أنه بيدور على حاجة ..
- نوح : وبعدين .. ؟
- سكرتير الجلسة : بعد ما شربنا الشاى .. قال لى باقول ايه
 .. ماتيجى نروح اى كازينو ناخذ فنجان
 قهوة .. قلت له فرصة ثانية اصر انى اروح
 معاه .. وقعد يلح .. واتكسفت منه ..
 ورحت معاه ..
- توحيد : يعنى ايه اتكسفت منه ؟ .. قال لك ايه
 بالظنيط .. ؟
- سكرتير الجلسة : ابدا قال لى تعالى ندردش فى ايام الجامعة
 .. ايام الشقاوة .. خدنى فى العريية ..

طلعنا على كازينو في الهرم .. خدنا القهوة
وقعدنا ندرديش ..

فاطمة : تدردشوا في آيه ؟ .. انت مش بتقول انك
مادخلتش الجامعة ..

سكرتير الجامعة : هو اللي كان بيتكلم في أيام الجامعة .. انسا
الكلمت في أيام الشقاوة .. وفي الآخر خالص
.. قال لي يا، راجل بلاش العبط اللي انت
عامله ده .. أرجع لمراتك وأولادك وأصدقائك
.. انت خايف من آيه ؟ .. مخبي آيه .. ؟ ..
مش عملية نوح .. والا فيه حاجة ثانية ؟ ..
هو قال لي كده وأنا اترعشت ركبى سابت
.. سألته .. آيه اللي عرفك بعملية نوح ..
قال لي انت .. انت الكلمت وانت نايم ..
سألته .. وعرفت ازاي .. ؟ المايكروفونات
بتجيب على بعد ستة متر مباني .. وأنا
ساكن على بعد اثناسر متر .. قال لي ..
آخر دفعة وصلت لنا بتجيب على بعد
خمسناشر متر .. (يهتق صوته بالكلمة)
.. انت المسئول يا استاذ نوح .. أنا حذرتك
.. وقلت لك .. انت اللي أصريت ..

نوح توحيد : طب اهدا .. اهدا ..
عزيزي أنا عاوز أؤكد لك انك مش انت اللي
أفشيت السر ده .. وما اعتقدش حتى انك
الكلمت وانت نايم ..

سكرتير الطلبة توحيد : أمال عرفوا ازاي ؟
المسألة ببساطة أن ده سر صحيح .. بس
مش سر بيننا .. ده سر بين الخمسة
وثلاثين مليون ..
(إخفاء تدريجي للاضائة)

* * *

المشهد الثاني

(قاعة المجلس الشعبي .. سكرتير الجلسة في مكانه ...
 نوح يدخل ويتبادل الحديث مع السكرتير ..: قبل أن
 يلحقه مكانه خلف المنصة)

نوح : ظهرت النتيجة .. ؟
 سكرتير الجلسة : ظهرت .. وكل الناخبين أبلغوا بميعاد
 الاجتماع ..

نوح : المجلس القديم .. نجح منه حد ؟
 سكرتير الجلسة : حاشوف دلوقت بنفسيك يافندم ..
 (يدخل مدير الاحتفالات ... يبدو على نوح الامتياح)
 ولكنه ينصب ابتسامة)

نوح : أهلا ... ألف مبروك ..
 مدير الاحتفالات : أهلا بك يافندم .. الله يبارك فيك ..
 نوح : الظاهر عندك قاعدة شعبية متينة ...
 مدير الاحتفالات : انا بالنجح في الانتخابات يافندم .. من أيام
 هيئة التحرير ...

نوح : أسمعني ...
 مدير الاحتفالات : (يتنسم ابتسامة لوزجة) .. أصل وشين
 سمح ..

(يواصل الحديث في نوح بنفس الابتسامة اللزجة ...
 وكأنها يتجدد .. يبدأ الآخرون في الدخول بهدوء ...

يتخلون أما كنهم .. إنهم نفس الوجوه .. نفس أعضاء
المجلس القديم .. نوح وقد استولت عليه الدهشة الشديدة
والانزعاج .. يتألك نفسه ويحاول جاهدا أن يبدو طبيعيا

نوح : ما كنتش عارف أنكم بتتمتعوا بثقة الناس
للدرجة دى .. ؟

احدهم : أدبك عرفت ..
نوح : (يفحص الموجودين بنظرة سريعة فيكتشف
غياب توحيد) .. أمال فين المهندس
توحيد .. ؟

مدير الأمن : للأسف سقط .. خد صوت واحد ..
اللى هو صوتُه ..
نوح : ليه .. ؟

مدير الاحتفالات : حايكون ليه .. شخص رزل .. وما حدش
بيثق فيه

نوح : ... ده كلام غير صحيح .. توحيد شخص
أهل لكل ثقة .. وفي الحالة دى أنا مضطر
أراجع الانتخابات بنفسى .. حارجع التذاكر
والنتيجة .. وكل حاجة ..
(يلتفتل تويعيد زعمه صندوق صغير)

توحيد : حاتلاقى النتيجة سليمة .. ما حصلش اى
تزوير فى الانتخابات .. أنا فعلا ما خدش
الا صوتى ..

نوح : أراى .. ؟
توحيد : فيه الفين صوت .. كنت ضامنهم فى جيبى
.. كسل الناس لللى شغالين فى الإدارة
الهندسية .. بيتقوا .. فى ويبحبونى .

- : راحت فين الاصوات دى .. ؟ ..
 : راحت اسكندرية والقيوم .. الأستاذ مدير
 الاحتفالات عمل رحلة أربعة أيام للإدارة
 الهندسية .. يومين في اسكندرية .. ويومين
 في القيوم .. بتلاين قرش . يا بلاش ..
 : يا باشمهندس ... انا ما قبلش التعميرش بي
 ... وأرفض كلامك الملء بسوء الظن ..
 الرحلة دى مقررة من خمس شهور ..
 ومستعد أجيب لجحرتك محضر لجنة
 الاحتفالات اللي عملت الرحلة دى ...
 : عزيزى أنت عبقرى .. انا عارفك كويس ..
 أنت تقدر تجيب فواتير بحفلات استقبال
 عملتها لنابليون ..
 : انا احتجج .. وباطلب من السيد رئيس
 المجلس ..
 : مفيش داعى .. انا مش جاي اشتكى .. ولا
 أحتجج على اللي حصل .. ولا انا حريص انى
 أقعد مع حضراتكم في مكان واحد .. انا جاي
 اسلم الرسومات الهندسية دى .. يمكن
 تنفعكم .. السلام عليكم ..
 (يستدير في طريقه للخارج)
 : استنى يا توحيد .. ما تخرجش .. انت
 عضو المجلس بالتعيين .. انا عينتك ..
 : حضرتك حاتلغى الديموقراطية بكلمة عشان
 المهندس توحيد .. ؟
 : اذن ما كانش فيه داعى للانتخابات ..
 مدير التعليم

مدير الصحة

: آه بقي .. بالمره .. وحضرتك تعين اللي عايز
تعيّنه

نوح

: الالفين شخص دول .. لو كانوا موجودين ..
كانوا انتخبوه ..

مدير المواصلات

: الديموقراطية ما فيهاش كلمة لو كانوا ..
الناس دول لو كانوا بيحبوه ومؤمنين بيه
صحيح .. كانوا يحرسوا انهم يتواجدوا في
مصر يوم الانتخابات .. مهما كانت اغراءات
الرحلة ..

توحيد

: (يواجههم) .. ما تتخوش قوى كده ..
(يلتفت لنوح) .. متشكر قوى يا استاذ
نوح .. كبريائي يجعلني ارفض اقعده مع
ناس مش عاوزني ..
(يستدير ليخرج)

نوح

: (يبسو عليه الاجهاد الشديد) .. استنى
يا توحيد ..

توحيد

: (يتوقف) .. اذا احتجتني حضرتك ..
في اى ساعة من ساعات الليل والنهار ..
اديني تليفون .. انا تحت امرك ..

نوح

: استنى يا توحيد .. ارجوك ماتمشيش ..
انا محتاجك جانبي ..

(يبسو عليه الامياء الشديد ... كما لو كان حل وشك)
الاشياء .. يرفع كفه الى جيبه .. يحاول التشبث بالمنصة

يَهَارَى عَلَى الْأَرْضِ بِيَطْمٍ .. تَوْحِيدٌ يَسْرَحُ إِلَيْهِ ،
يَتَلَقَّاهُ بَيْنَ ذُرَاعَيْهِ .. سَكْرَتِهِرَ الْجَلِيسَةِ يَتْرُكُ مَكَانَهُ وَيَحْتَفِ
لِمُسَاعَدَتِهِ .. الْمَوْجُودُونَ يَجْلِسُونَ بِأَلْمَالَةِ .. وَبِأَلْسِرَاكِ)

: دكتور يا جماعة .. دكتور .. دكتور ..

توحيد

(يَنْظُرُونَ لَهُ فِي صَمْتٍ .. يَشِيحُونَ بِوُجُوهِهِمْ بِمِيدَا
عَنْهُ .. تَخَفَتِ الْأَضَاءُ ..)



المشهد الثالث

(في كابينة القيادة على سفينة نوح ، نوح مرتديا ملابس قبطان بحري يقف أمام جهاز ارسال صغير ، ويتحدث في المايكروفون ... مع بداية المشهد نسمع لأصوات سرينات بحرية)

: من قائد « عملية نوح » الى أجهزة القيادة في نوح واحد ونوح اثنين ونوح ثلاثة . تمت عملية نوح بنجاح .. اشكركم .. خلدوا الاطهار الصحيح .. الانزال حيا يكون بعد اربعة وعشرين ساعة .. في الموقع اللى تم تحديده من قبل طبقا للخطة الموضوعة .. الماكينات في اقصى قوتها .. باقصى سرعة .. الجزء الثانى من « عملية نوح » يبدأ تنفيذه منذ هذه اللحظة .. بندا .. اشارات لاسلكية للعالم كله بمهمتنا .. بندب .. اشارة لاسلكية .. لكل المصريين المبدعين في كل المجالات ، الذين يعيشون في الخارج .. صيغة الاشارة بسيطة جدا وواضحة .. نحن في حاجة اليكم ... الجزء الجاى من كلامى خاص بركاب السفن الثلاثة ... وصلنى بيهم لو سمحت .. (صوت تكية) .. شكرا ..

نوح

(هذا الجزء يتابع من سماعات صالة المسرح
 وبأعلى درجة للصوت) .. من قائد عملية
 الانقاذ الى السادة الركاب .. ايها السادة
 .. يا أحسن العناصر في مصر .. لقد اختارتكم
 الأقدار لتصنعوا ما لم يصنعه أحد من قبل
 .. أن مهمتكم شاقة وصعبة .. ولم يذكر
 لنا التاريخ مهمة أكثر منها صعوبة ومشقة
 .. إلا أنني أومن أنكم قادرون على اتمامها ..
 أتمنى لكم التوفيق وشكراً ...

(يغفل جهاز اللاسلكي ويستدير مبتعداً .. في اللحظة التي
 يدخل فيها مدير الاحتفالات)

مدير الاحتفالات : يا سلام يا أستاذ نوح .. كلمتين .. بس هم
 .. القائد العظيم لما يتكلمم .. يقول سطرين
 بس .. بس سطرين يحركوا الجماد .. الف
 مبروك يا أستاذ نوح ..

نوح : ما شفتش الدكتور فاطمة .. ؟

مدير الاحتفالات : أنا شفتها في الطريق وأكبة عربية .. بس لما
 جينا أسكندرية .. اختفت مني في
 الزحمة ..

نوح : ما حدش شافها وهي بتركب .. ؟

مدير الاحتفالات : مؤكدة ركبت .. حانصل حصر للركاب فورا ..
 بس فيه موضوع المجلس كلغنى أنى اتكلم معاك
 فيه ..

نوح : مغيش وقت للكلام .. أقرؤوا الخطة كويس ..
 معقول حساب كل حاجة ..

- مدير الاحتفالات : أصل الجماعة لهم رأى ثانى ..
 نوح : رأى ثانى فى آيه .. ؟
 مدير الاحتفالات : يقولوا يعنى .. (نوح ينظر له بحدّة
 فيتعلم) .. العملية ... وعلى آيه ..
 أجيبهم يشرحوا لك .. (يصيح) ..
 اتفضلوا يا أساتذة ..
 (يدخل أعضاء المجلس)
- نوح : آيوه يا حضرات .. فيه حاجة .. ؟
 مدير التكوين : استاذ نوح .. احنا فكرنا كويس فى الموضوع
 .. ولقينا أن حكاية البناء دى مستحيلة ..
 نوح : مستحيلة يقنى آيه .. ؟
 مدير الصحة : يبقى جنون لما نزل فى الصحراء وما عندناش
 شيكارة أسمنت واحدة ..
 مدير التعليم : حتى كمية الأكل والمياه اللي معنا مش كفاية ..
 نوح : انا وجهت نداءات دلوقت ..
 مدير الاحتفالات : الحاجات دى مانتعش فيها النداءات .. احنا
 فكرنا كويس وقرنا ..
 نوح : قررتم ... ؟
 مدير الخزنة : آيه ؟ .. مستكتر علينا أن احنا نقرر .. ؟
 مدير الثقافة : مش كفاية سبائينك بتصرف لواحدك من
 الأول ..
- مدير الاحتفالات : اسمعنا يس يا استاذ نوح .. مش جازر رأينا
 يطلع صح ..
 نوح : اتفضلوا ...
 مدير الإسكان : احنا دلوقت نطلع على كلبا ..
 (تتوأن كلماتهم يحاصرون بها نوح الذى يكاد يصق)

:
 :
 :
 :
 :
 :
 :
 :
 :
 :
 :
 :
 :
 :
 :
 :
 :
 :
 :

:
 :
 :
 :
 :
 :

:
 :
 :
 :
 :
 :

:
 :
 :
 :
 :
 :

.....
: هي فين دي .. يص من الشباك .. احنا
طالعين على الصحرا ..

نوح
: هي دلوقت صحرا .. بس انا شايفها .. اقدر
المسها بأيدي .. شايف مصانعها وشوارعها
.. شايف أطفالها يلعبوا في الجنائين
ملياتين صحة .. المسألة محتاجة شوية
خيال ..

.....
: أهو هو ده اللي احنا بتعرض عليه .. الخيال
.. احنا ناس واقعيين جدا ..

مدير الاحتفالات : خلاص بقى يا جماعة .. احنا عملنا اللي
طينا وأرضينا ضميرنا .. نقول له بقى ..
(يلتفت لنوح) .. استاذ نوح .. احنا
ماتقبوش نسيب عملية زى دى تفشل
يسيب واحد خيالى زى حضرتك ...
المجلس خد قرار بمزلك .. وتعيين اكبر
الاعضاء سنا .. والقرار بيطلع استنسل ..
(نوح يتحرك .. في نفس اللحظة ، يهجم عليه اثنان
يطوقانه من الخلف .. يشلان حركته تماما .. المفاجأة
تمتد لسانه .. في نفس اللحظة يتقدم مدير الاحتفالات
من مايكروفون جهاز الاسلكى)

مدير الاحتفالات : بيان من القائد الجديد « لعملية نوح » ..
لسادة ركاب سفن الإنقاذ نوح واحد ونوح

الذين ونوح ثلاثة .. تقرر تغيير وجهتنا ..
سننطلق الآن الراكب الثلاثة متجهة الى ..
(نوح يصرخ مغالما وهو يجادل عبثا الصلص من
القائمين عليه)

نوح : احنا طالعين على مصر .. (يصرخ فيهم) ..
اطلعوا على مصر ... يا اغبيا ...
مدير الاحتفالات : (بقسوة باردة هادئا تماما) .. سكتوا
الافندي ده ..

(أحدهم يضربه حل رأسه بكعب سدس .. يتهاوى نوح
حل الأرض بيظه شديد جدا ... تبدو حركة نوح
والهجومه حوله .. كأنما تقدمها آلة عرض سينما
بطيء .. تحفت الاضائة بنفس إيقاع الحركة ... عندما
يصل إلى الأرض .. يكون المسرح قد أظلم تماما ...
ثم تنزل ...)

الستار

* * *

الفصل الثالث

الشهد الأول

(غرفة في مستشفى ... نوح يرتدى بطلوثا و جاكته
بيجاما ... يخلع جاكته البيجاما ويتناول قميصا يأخذ
في ارتدائه .. تلتفت فاطمة)

- فاطمة : آيه يا نوح .. آيه اللى بتعمله .. ؟ ..
- نوح : بالبس .. زهقت من السرير ..
- فاطمة : الدكتور مصر انك تقعد كمان يومين ..
- نوح : اتفضل البس البيجاما ونام على السرير ..
- فاطمة : خلاص .. آنا استريحتم بما فيه الكفاية ..
- نوح : الدكتور هو اللى يقرر ده ..
- نوح : حاستريح في البيت .. لو قعدت هنا حاتمب
أكثر .. مش عارف أنام هنا .. هنا
بامرض لكوابيس قظيمة .. باحلم أحلام
مخيفة ..
- فاطمة : عيبك انك مكابر .. مش عاوز تعترف انك
مصاب بانهيار عصبى ... نتيجة للاجهاد ..
- فاطمة : نتيجة للشغل ليل ونهار .. المطلوب انك
تستريح كمان يومين ..
- نوح : حاضر ..
- فاطمة : حاضر آيه .. بتاخذنى على قد عقلى .. ؟
- نوح : خلاص يا فاطمة .. مش حاجهد نفسى ..

حاشتنفل بطريقة مريحة (يرفع سماعة
التليفون) .. ادينى البوابة لو سمحت ..
من فضلك يا مدموزيل .. فيه واحد
حاييجي يمسأل على دلوقت .. خليه يطلع
على طول ..

- فاطمة : مين ده .. ؟
نوح : مدير الأمن ..
فاطمة : غاوزك فى أيه .. ؟
نوح : أنا اللي تعارزه ..
فاطمة : الدكتور مانع الزيارة يا نوح ..
نوح : أنا اتفاهمت معاه .. سمح لى استقبل زوار
.. بس بدون انفعال .. بدون توتر ..
فاطمة : أفهم من كده ان فيه حد تانى حاييجي
يزورك .. ؟ ..
نوح : ايژه .. أعضاء المجلس ..
فاطمة : بتقول بدون توتر .. ؟ ..
نوح : أرجوكى يا فاطمة هى حياتى كده .. الراحة
بالنسبة لى ترف .. ويمكن تكون جريمة ..
أنا فاضى استريح .. ؟
فاطمة : آمال فاضى لايه ؟ .. تعيا وتنهار .. ؟ ..
نوح : ممكن تكلمنى وانت نايم .. ؟
فاطمة : دى ممكن ...
فاطمة : ويمكن اللى ييجى يزورك ... تتكلم معاه
وانت نايم ؟
نوح : ممكن .. أهو ..
(يرتد على السرير)

- فاطمة : وإيه الفايذة .. حالتكم .. وتنعمل ..
وتتوتز ..
- نوح : ماتخافيش يا فاطمة .. خلاص .. أنا بقيت
كويس فعلا ..
(طرقات على الباب)
- نوح : أدخل ..
(يدخل مدير الأمن ومعه باقة من الورد ، تصافحه
فاطمة وتأخذ منه باقة الورد ، يصافح نوح الذي يهم
بالهوض من سريره)
- مدير الأمن : خليك مستريح يا أستاذ نوح .. ماتتعبش
نفسك ..
(فاطمة تقدم له مقعدا في مواجهة نوح .. بالطبع نوح
ينسى نفسه خلال محادثته مع مدير الأمن ويترك السرير)
- نوح : سيادة اللوا .. أنا سعيد جدا بزيارتك ..
مدير الأمن : قالوا لى فى البيت أنك اتصلت بى مرتين ..
خير .. ؟ ..
- نوح : خير انشاء الله .. الموضوع باختصار انى
عاوز اكلم حضرتك فى الكشوف اللى عملتها
فى المجلس ..
تحت أمرك ..
- مدير الأمن : أنا مش باكلمك بصفتك عضو المجلس .. أنا
نوح : باكلمك بصفتك مسئول الأمن فى المحافظة ..
باخاطب فيك ضميرك الوظيفى .. كرجل أمن
تهمه بلده .. مش مصر تهمك برضه .. ؟
مدير الأمن : ومين ماتهموش مصر .. ؟

- نوح** : اتفطنا .. قطعا يا سيادة اللوا .. فيه عندهم
في أجهزة الأمن المختلفة .. كشوفات فيها
اسماء أحسن العناصر في البلد ..
- مدير الأمن** : نعمل بيها إيه يا أستاذ نوح ؟ .. أنا ممكن
في ربع ساعة أجيب لك كشوف فيها أسماء
أسوا العناصر في البلد .. لكن حكاية العناصر
الكويسة دي مالناش دعوى بيها .. وعمرها
ما كانت مطلوبة ..
- نوح** : أنا فاهم غير كده .. اللي أعرفه .. انهم لما
بييجوا يعينوا حد في منصب بياخذوا رأيكم
.. ده كويس .. والا لا ؟ ..
- مدير الأمن** : السؤال ما بيقاش كده .. السؤال بيبقى ..
ده وحش والا لا ... يعني هل عنده سوابق
.. ؟ .. متورط في أشياء مريبة .. ؟ ..
- نوح** : وكفاءته في العمل .. ؟ ..
- مدير الأمن** : واحنا مالنا ومال كفاءته .. احنا مهمتنا
نعرف سوابقه ..
- نوح** : ولما أحب أعرف كفاءة واحد في الشغل ..
أسأل مين .. ؟ .. أسأل الاتحاد
الاشتراكي .. ؟ ..
- مدير الأمن** : لو حضرتك بعث تسأل الاتحاد الاشتراكي ..
حايحول الجواب علينا ..
- نوح** : (وقد بدأ يتوتر) .. ياسلام .. ياسلام ..
حايحول الجواب عليكم ..
- فاطمة** : (لهفته) .. بدون توتر يا نوح ..
- نوح** : حاضر .. (لمدير الأمن) .. حصلت قبل كده
الحكاية دي .. ؟ ..

- مدير الامن : كثير .. الاتحاد الاشتراكي مرة عمل حاجة
اسمها التنظيم الطليعى .. اى واحد يدخل
التنظيم ده كان لازم يسألنا عنه ..
- نوح : فلو كان سىء .. ما يدخلش ..
- مدير الامن : مش قاعدة . والله دى مسالة محيرة يا استاد
نوح .. انا نفسى مش فاهمها .. ساعات
نقول لهم على واحد انه وحش ..
- نوح : يقوموا يرفدوه ..
- مدير الامن : لا .. يصعدوه وجايز يرفدوناه ..
- نوح : ليه .. ؟ ..
- مدير الامن : مانا باقول لحضرتك انها مسالة محيرة ..
- نوح : تقصد مسالة مفزعة .. (وقد بدأ يفقد
اعصابه) .. يعنى يا سادة اللوا .. نقدر
نقول باختصار شديد ان احنا بقى لنا عشرين
سنة .. عندنا أجهزة نعرف بيها أسوأ
العناصر .. لكن ما عندناش أجهزة تقول لنا
مين احسن العناصر ..
- فاطمة : مش كده يا نوح .. مش كده ..
- نوح : (صائحا فيها) اسكتى يا فاطمة .. (يتمالك
نفسه) .. آسف يا فاطمة . آسف ..
ارجوكى اعدىنى ..
- مدير الامن : استاذ نوح .. حقيقى يابنى انت بتصعب على
.. مليون مثل ووطنية .. لكن منعهم الخبرة
يابنى المسائل سايحة .. انا ساعات يجى لى
تقريرين عن شخص واحد فى اليوم ..
تقرير بيقول انه ممتاز جدا .. وتقرير بيقول

انه سيء جدا .. انا امبارح جبالى تقرير هن
واحد انه من اتباع سعد زغلول ..

نوح
مدير الامن
دي مسالة خطيرة جدا ..
: حضرتك بتجسد المسالة بطريقة مبالغ فيها ..
دي مسالة عادية جدا .

نوح
مدير الامن
لا .. دي مسالة خطيرة فعلا .. معنى كده
ان خطتى بتتهز من أساسها .. عملية نوح
كلها مبنية على اختيار أحسن العناصر ..
: مفيش حقيقة مطلقة .. كل حاجة نسبيه ..
الكشوف اللى معاك فيها أحسن العناصر
نسبيا ..

نوح
مدير الامن
هو ده الفرق بينى وبينكم .. انا بادور على
المطلق .. انا بادور على أحسن مصر فى
الدنيا .. وانتم عاوزين تعملوا اى حاجة ..
: انا آسف جدا .. كان بودى أساعدك ..
لكن ..

نوح
فاطمة
نوح
لكن ايه .. ! .. اهى هى لكن دى .. لكن
دي اللى حاتموتنى ..
: (تتدخل مهدئة للموقف) .. ممكن نغير
الموضوع .. ؟ .. يستحسن نتكلم فى حاجة
مبهجة .. نام يا نوح .. نام على السرير ..
حاضر .. حانتكلم فى حاجة مبهجة ..
حانصب القعدة دلوقت ونقول نكت ..
ياالله يا سيادة اللواء .. قل لنا نكته ..
أراهنك لو عرفتى تفرى الموضوع ..
اتحداكى لو عرفتى تتكلمى عن حاجة مبهجة ..

يا الله .. كلميني عن اغنية مبهجة .. كلميني
عن مسرحية عظيمة ... احكى لنا عن فيلم
جميل .. يا الله .. كلميني عن مستقبلنا ..
حاضر .. مش حانفعل .. مش حانوتر ..
حاهدا .. وادى الاقراص اللي بتهدى
(يتلغ عدة اقراص دفعة واحدة) .. حاخذ
المسائل ببساطة ... كل المسائل حاخذها
ببساطة .. وحنام (يقفز فوق السرير) ..
اهو .. وحنقطى .. اهو .. (يجذب عليه
الغطاء .. يختفى تماما تحت الغطاء ..
تمر لحظات) .. انا بنام فعلا دلوقت ..
(يكشف الغطاء عن وجهه ويتكلم بهدوء
شديد ..) .. نوم هادى .. عميق
.. كما الاطفال .. (يبدأ صوته فى
الارتفاع ..) يا الله احكوا لى حواديث عشان
انام .. هاتولى كل الادوية المنومة اللي فى
الدنيا .. عشان انام ... (يغطى وجهه ثم
يكشفه بعد لحظة) .. بعد ما عرفت ان بعد
عشرين سنة .. كنا مهتمين بس بأسوأ
العناصر .. ويا عالم .. كانوا اسوأ العناصر
والا لا ... سيادة اللؤاء يقول ان المسائل
كانت نسيحة .. ومع ذلك مطلوب منى انام
.. حاضر .. حنام .. يا الله يانوم ... (صائحا)
يا الله يا نوم (يصرخ كالطائر الجريح) ..
عاوز انام يا ناس ..
: اهدا يا نوح .. اهدا .. لو استمررت بالشكل
ده ... حاجيب لك الدكتور ..

فاطمة

نوح : اندهيله .. هاتيه فوراً .. حاقول له
الحكاية دى .. أما اشوف حايعرف ينام
أزاي .. هاتولى دكاترة البلد كلها ..
عشان اقول لهم الحكاية دى .. اراهنك
لوحد فيهم عرف ينام .. دول ناس بيتشظروا
علينا احنا بس .. عاوزينا احنا بس اللي نهذا
وننام ..

مدير الأمن : أنا آسف يا مدام .. دى حالته لا تسمع
بالزيارة فعلاً ..

فاطمة : نوح ...

نوح : فاطمة .. أنا سليم جداً .. متمالك نفسى
تماماً .. وفاهم جداً .. وهى دى الكارثة
.. أنا باهرج بس .. طلع فى مخى انى أهرج
شوية .. عاوز أزعق وأقول أى حاجة ..
عاوز أهبل يا ناس .. هو ده علاجى
الوحيد .. انى أهبل .. أنا آخذ كل حاجة
جد .. والجد حايقتلنى ..

مدير الأمن : أستاذن أنا يا مدام ..

نوح : أنا متشكر قوى يا سيادة اللوا .. وآسف اذا
كنت أزعجتك ..

مدير الأمن : لا أبداً .. ربنا يكون فى عونك ..

(فاطمة توصله إلى الباب .. قبل أن يخرج يكلمها همسا)

مدير الأمن : هو عيبه أنه ما بياخدش المسائل ببساطة ..

أمال لو قرأ التقارير اللي اتكتببت فيه كان عمل

أيه .. ؟

فاطمة : يقولوا عليه آيه .. ؟ ..

- مدير الأمن : عندك من تهريب العملة وطالع .. آخر تقربر
فيهم يقول انه عميل لعشر دول اجنبية ..
سلام عليكم يا بنتى ..
(يخرج مدير الأمن)
- نوح : (هادئا تماما) ... ولى لى سيجارة يا
فاطمة ..
(تشعل له سيجارة وتتأمله بهدوء)
- نوح : فاطمة . اطمنى ..
فاطمة : على ايه .. ؟
- نوح : ما حدثش فى عيلتنا أصيب بالجنون ..
ما تخافيش على .. انا اترادى أقوى من
مقلى .. انا هادى .. وحافضل هادى على
طول ..
- فاطمة : ياريت ..
نوح : حاتشوفى ..
- .. (جرس التليفون .. يمد يده ليرفع الساعة ولكنها
تلتقطها قبله)
- فاطمة : يا مدموزيل .. الزيارة ممنوعة .. انا حانزال
لهم حالا ..
(تضع الساعة)
- نوح : هم مين .. ؟ ..
فاطمة : أعضاء المجلس ..
- نوح : يا شخية خليفهم ييجوا .. خلاص انا هديت
.. مش حاكلمهم فى حاجة ..
- فاطمة : حضرتك كنت حاتتجنن من شوية .. لما
كلمت واحد فيهم .. واحد بس .. حايجصل
ايه لما ييجوا كلهم .. ؟

- نوح** : ولا حاجة .. خلاص .. الأزمة عدت .. كمان مش حاكلهم في الشغل .. أرجوكى يا فاطمة خليهم يتفضلوا .. مفيش داهى يحسوا أن حالتى سيئة .. لازم يشعروا أن كل شىء على ما يرام .
- فاطمة** : لو فقدت أعصابك .. حانادى الدكتور فوراً .. أو حانسحب ..
- نوح** : مش حاققد أعصابى .. أنا عندى أعصاب عشان أفقدها ..
- فاطمة** : (ترفع سماعة التليفون وتتردد لحظة) .. الو .. خليهم يتفضلوا يا مدموزيل .. (تضع السماعة)
- (يدخل الجميع ، فلاحظ أنهم يرتدون كرافات سوداء ، كل منهم يحمل باقة ورد صغيرة ، يحيون فاطمة بهزة رأس وابتسامة .. يرصون باقات الورد حوله على المرير ، يحيطونه بالورد تماما .. تمر لحظات صمت طويلة)
- نوح** : لو سمحتوا شيلوا الورد من حوالى .. أنا لسه ما متمش .. (يرفعون باقات الورد ويناولونها لفاطمة التى تكوبها فى ركن)
- : حمد الله على سلامتكم يا أستاذ نوح ..
- : اهى المرة دى تعلمك أنك تاخذ اللىسائل ببساطة ..
- : يا راجل ... صحتك بالدينا ..
- : متهيأله أنه حا يصلح الكون لواحد ..

-
 : روق كده وما تخافش .. ما تفكرش في الشغل .. وراك رجالة ..
- فاطمة
 : لو سمحتم يا جماعة .. الدكتور سامح بالزيارة على أساس أنها تكون هادية .. اى كلام في الشغل خطر على صحته ..
- نوح
 : (بحزم) .. فاطمة أرجوكى .. أنا ماحبش حد يتدخل في شغلى .. مهما كانت درجة صلته بى ..
- فاطمة
 : حاضر .. أنا آسفة .. تحب أسيب الأودة كمان .. ؟
- نوح
 : لا .. ماحبش .. وآسف .. (لأعضساء المجلس السدين يقفون محيطين به) .. أنا متشكر يا جماعة للزيارة دى .. وعاوز انتهر الفرصة دى عشان اترككم في مسألة الكشوف ..
- الجميع
 : تانى ... ؟
- نوح
 : بصراحة يا جماعة .. مش قادر أقنع ضميرى .. أن الاسماء اللى انتم حطيتوها .. هى اجسن الاسماء في البلد ..
- الجميع
 : نشيل اسامينا عشان تستريح .. ؟
- نوح
 : لا .. مش باطالبكم بكده .. احنا بشر .. ولا يمكن حانجب الاخرين اكثر مابنحب نفسنا .. أنا موافق على اساميكم .. بس عاوزين نتكلم بصراحة ..
- الجميع
 : اتفضل ..
- نوح
 : تلعب ورقنا على المكشوف .. مفيش داعى للمجاملة .. حضراتكم مش احسن العناصر في البلد .. كده على بلاطة .. وانتم عارفين ده كويس .. ومع ذلك .. اوعدكم بشرفى

انكم اول ناس حايتم انقاذكم .. بس على شرط .. تختاورلى عشرة آلاف واحد ابقى وابق قدم ضميرى انهم احسن العناصر فى مصر .. ايه رايبكم فى الصفقة دى .. ؟ .. انا انقذكم وانتم تنقلوا عملية نوح .. انا باقدم لكم حياتكم رشوة ..

: انا عن نفسى ارفض هذا الكلام .. ارفض
: اى كلام عن نزاهتنا ..

: خلاص .. حضرتك تروح فى داهية ..
(للجميع) .. وانتم .. ؟

: استاذ نوح .. لو وافقنا على الصفقة بتاعتك دى .. يبقى معناها ان الكشوف اللى عملناها مش سليمة ..

: تحب نلطف لك بشرفنا انها سليمة ..

: ثم حضرتك ازاي تعرض علينا رشوة .. ؟
: مش وقته يا جماعة .. القضية دى نبقى نثريها بعدين ..

: الظاهر الانهيار العصبى اثر على تفكيره ..
: انا مش عارف الدولة ازاي تكلفه بمسألة خطيرة زى دى ..

: فكروا فى اللى باقوله .. فكروا كويس ..
والا اشتغل لوحدى بطريقة تانية ..
: انت حر اشتغل لواحدك ..

: ما تفكروش انى عاجز .. انا اقدر اشتغل .. وفى الحالة دى .. خاطريتها على دماغ ابوكم .. لسه قدامكم فرصة تفكروا فى اللى باقوله ..

.....

نوح

.....

.....

.....

نوح

نوح

-
- أستاذ نوح .. احنا هنا مجرد زوار وحضرتك
مجرد مريض .. وعلى هذا الاساس حانفوت
الكلام اللي قلته .. لكن بعمد كده لينا حساب
تاني ..
- نوح : بتهددني معنى .. ؟ .. خلاص .. ؟ ..
مش عارف اتفاهم معاكم ؟ مقيش بيننا لفظة
مشتركة .. ؟ طب الحل ايه .. ؟ .. اقع
في عرضكم .. ؟ .. انزل من على السرير
وأبوس رجلكم واحد .. واحد عشسان
تشتغلوا بما يرضى الله .. وبما يرضى
البلد .. ؟
- مدير الاحتفالات : يا الله بينا يا جماعة ..
(يدخل توحيد في نفس اللحظة التي همون فيها بالحركة ..
توحيد يحيل معه كية هائلة من ورق الجرائد)
- نوح : أهلا يا توحيد .. انت فين يا توحيد .. ؟ ..
انت سايب الجماعة دول يلتهموني .. ؟ ..
كلمتك في البيت امبارح ما كنتش موجود ..
كنت باعزى ..
- توحيد : البقية في حياتك .. مين مات .. ؟
واحد تعرفه .. مدير الاسكان ..
- نوح : (هامسا لنفسه جانبا) .. هانت .. فاضل
تسعة آلاف وتسعمائة وتسعين .. (لهم)
.. ما قلتوش ليه يا جماعة .. البقية في
حياتكم ..
انت اديتنا فرصة نكلمك ..
- نوح : آه صحيح .. ده كلهم لابسين كرافتات
سودا .. ايه اللي معاك ده .. جرايد السنة
دى .. ؟

توحيد : ٧ .. دى جرايد النهاردة .. دول الثلاث

جرايد ..

مدير الاحتفالات : (بركة شديدة وبلهوجة كانما يريد الخلاص

من الموقف) .. يالله بينا يا جماعة ..

عشان نسيبهم يدردشوا .. سلامتك يا

استاذ نوح .. يالله بقى سيب السرير ..

عشان نوضب لك حفلة حلوة قوى .. حلوة

السلامة .

(الجميع يسرعون في اتجاه الباب)

توحيد : (لا يقف بجسمه أمام الباب يعترضهم) ..

استنوا يا جماعة .. استنوا .. مش

تستنوا لما نتكلم شوية عن المرحوم .. عن

مآثر الفقيه .. مش تدوتنا فرصة نذكر

محاسن موتانا .. (نوح) .. الجرايد

النهاردة . كل جورنال طالع ٢٢٠ مائتين

وعشرين صفحة .

توحيد : ملاحظ .. ؟ ..

توحيد : لا .. صفحة الوفيات لوحدها ٢١٢ صفحة

مائتين واثناشر صفحة ..

توحيد : يا خبر .. حصل كارثة ؟ -

توحيد : فعلا ..

توحيد : باخرة والا طيارة .. ؟

توحيد : ما قلت لك ... مدير الاسكان (يهسك

بجريدة ويقسراً) .. توفى المهندس فلان

الفلانى مدير الاسكان .. جوز بنت الدكتور

فلان الفلانى مدير المنطقة الطبية . ابن خالة

الاستاذ فلان الفلانى مدير التعليم وابن عم

فلان الفلانى مدير الاحتفالات .. وجوز بنت
خال الشيخ فلان الفلانى .. مدير الأوقاف
وإبن عم حرم كل من مدير الخزنة العمومية ..
وقريب كل من السادة الآتية أسماؤهم ...
عشرة آلاف اسم .. العشرة آلاف اسم دول
.. حاتلاقيهم هم العشرة آلاف اسم اللى
عندك .. لو حضرتك كنت رحت تعزى امبارح
بالليل في جامع عمر مكرم .. يا أما كنت
حاتموت من الضحك .. يا أما كنت حاتموت
من الغم .. صيوان وفيه يا أستاذ عشرة آلاف
شخص كلهم بيمثلوا عائلة فلان الفلانى ..
العشرة آلاف اللى كانوا في الصيوان .. هم
اللى اسمهم منشور في الجرايد النهاردة ..
هم العشرة آلاف اللى المفروض فيهم انهم
بيمثلوا روح مصر .. طلعت من العزى على
صديق لى متخصص في التاريخ المصرى
القديم ... سألته عن عائلة فلان الفلانى ..
انضح أن جدهم الكبير كان رئيس الحكومة
أيام الملك ميña .. الأسرة دى استلمت الجهاز
الإدارى بمجرد ما ميña وحد الوجهين ..
(لنوح) .. مبروك يا عزيزى .. هذه هى
عملية نوح .. بدأت من أجل انقاذ روح
مصر .. تحولت لعملية انقاذ جهاز الموظفين
اللى بيحكموا البلد .. وأخيرا بكتشف أنها
انتهت بانقاذ أسرة واحدة .. عائلة واحدة
بتنحل في وبرنا من آلاف السنين ..
(يهاجم نوح بشدة) ... عندك كلام تدافع

بينه عن خطتك .. عندك كلام تدافع به عن
عملية نوح الفاشلة .. الساذجة ..

: (تصحيح فيسه) .. يا باشمهندس . انت
بتتكلم مع انسان مريض ..

: انا باتكلم مع انسان مسئول .. مش عاوز
يفهم .. كان لازم يعرف من الاول انه لا
توجد في مصر وسيلة لمعرفة أحسن عناصرها
.. مفيش تنظيمات كفيلة بكدة .. مش
حانعرف مين الكويس الا اذا الناس اتحركت
في اتجاه هدف ما .. خطتى كانت بسيطة
وسهلة .. نتجه شرقا لارضنا .. ونشتغل ..
هنا العناصر الكويسة بتبان ..

: خطتى سليمة يا توحيد .. عمليتى ناجحة
ماية في المايبة .. الناس دول هم اللي
وحشين ..

: الناس دول كويسين قوى .. ومش حاتلاتنى
أحسن منهم .. الكارثة ان عقولهم ما
حصلهاش اى تدريب على النزاهة والابداع ..
عقولهم متمرنة ازاي تحافظ على مناصبها ..
ازاي تتجنب غضب الحاكم .. دول مساكين
يا استاذ نوح .. ما بيشوفوش ربع متر
حواليهم ... واقعين جوه نفسهم .. هات
اى واحد فيهم واسأله .. ما تعرفش دكتور
كويس .. ؟ .. هو حايعرف مينين .. ؟ ..
حايسأله مراته . مراته حاتدله على الدكتور
ابراهيم جوز بنت عمته .. افرض ما بسألش
مراته .. حايسأل زميله اللي قاعد جانبه ..

فاطمة

توحيد

نوح

توحيد

ما يعرفش هو راخر حايسال خاكنه خاتله
على الدكتور فوزى جوز بنت خالتها وفى
الحالة دى حايتهين الدكتور ابراهيم
أو الدكتور فوزى ... والاثنين من عائلة
فلان الفلانى .. لكن صدقنى هم ما يعرفوش
انهم من عائلة واحدة .. بيكتشفوها بس لما
حد يموت لهم . ويتقابلوا فى العزا .. أستاذ
نوح للمرة الأخيرة .. والا حاضرب نفسى
بالنار . قدامك دلوقت .. باسم اشرف
وأجمل الاشياء .. أرجوك .. الغى عملية نوح .
(توحيد يلهث بمد أن يذل مجهودا عنيفا فى القاء كلمته ..
الصمت يسود المسرح فى انتظار ما سيقوله نوح .. نوح
ينهض من على السرير وينزل الى الأرض .. يفتح
الحقيبة الكبيرة التى لا تفارقه .. يخرج منها مطروفا
أصغرا كبيرا ..)

نوح

: اذا الواحد خسر كل شيء .. على الأقل ما
يخسرش شجاعته .. فعلا التجربة أثبتت
أن عملية نوح غير قابلة للتحقيق .. أنا حاروح
أعرض الموضوع كله على رؤسائى .. حاروح
أعرض فشلى ..

مدير الاحتفالات : (بهدوء شديد . أنه هنا شخصية مختلفة
تماما ... حازم ، بارد .. يوحى بأنه
يستطيع أن يسود أى موقف اذا أراد ..)
مفيش داعى يا أستاذ نوح .. احنا اللي
حانتولى المسألة دى ..

نوح

: مسألة إيه ؟ ..
مدير الاحتفالات : مسألة عرض فشلك على رؤسائك ..

- نوح** : انت بتتكلم بصفتك ايه يا استاذ .. ؟ ..
- مدير الاحتفالات** : انا معايا تفويض من المجلس كله انى اتكلم باسمه .. وبطل بقى نفمة التعالى اللى بتتكلم بيها ..
- فاطمة** : من فضلكم .. ممكن ننهى المسألة دى دلوقت ..
- مدير الاحتفالات** : مذاق من فضلك .. احنا سئمنا المعاملة اللى بنتعامل بيها ..
- : ده متصور أن مغيث وطنى فى البلد الا هو ..
- : الاستاذ نوح مصاب بجنون العظمة .. وأنا مش باقول اى كلام ... انا طبيب ومسئول عن كلامى ..
- : انا مش عارف ازاى المسئولين يكلفوا واحد مهزوز بعملية خطيرة زى دى .. ؟
- : احنا ناس عندنا ضمير .. ولينا تاريخ .. وما نقدرش نسمح بضياح روح مصر بسببه ؛
- مدير الاحتفالات** : مش عاوزين كلام كثير من فضلكم .. استاذ نوح .. تقرير المستشفى ارسلت منه نسخة للقومسيون الطبى .. فيه قرار من القومسيون الطبى أن حضرتك لا تؤتمن على اتخاذ قرارات لها صفة الاهمية ..
- توحيد** : ما هى العائلة فى كل حجة ..
- مدير الاحتفالات** : (لتوحيد بصراحة) .. حسابى معاك بعدين يا باشمهندس ... (لنوح) .. لو سمحت سلمنا كل أوراق عملية نوح .. احنا اللى حائنفد العملية ..

نوح (يتشبث بالظرف باحساس غريزي بالخوف)
... عملية نوح مش مجرد عملية فاشلة ..
دى عملية خاطئة . سيعرتب عليها تدمير روح
مصر .. دى جريمة ..

مدير الاحتفالات ادينا الظرف .. ما تضطرناش نلجأ للقوة ..
(يتوزعون فوراً ، إثنان منهم يمدان مكان الخروج ..
والآخرون يتقدمون فى اتجاه نوح)

نوح يحدق فى وجه مدير الاحتفالات ..
دى اسوا حفلة عملتها فى حياتك .. حادفك
ثمها غالى ..

مدير الاحتفالات ه .. لو خرجت من المستشفى أبقي دفعتى
ثمها .. أدبنى الظرف يا أستاذ نوح ..
مفيش دامى للمقاومة .. خليك واقعى ..
حاتبهدل انت ومراتك ..
(صوت الانذار ينبعث من الحقيقة .. مفاجىء .. حاد ..
متقطع .. مفزع)

فاطمة : الانذار ...
(الجميع يتسمرون فى أماكنهم وقد الجسهم المفاجأة ..
فاطمة تسرع للحقبة .. تخرج ساعة التليفون)

فاطمة : (تدارى اضطرابها بشجاعة هادئة) .. أيوه
يا دكتور .. أنا فاطمة .. أيوه .. نوح
موجود .. والانذار وصل لنا .. اطمن ..
أخبارك أيه .. ؟؟ (تلتفت لنوح) .. قدامنا
أربعة وعشرين ساعة .. (تحلق فى لأشياء
وهي تنقل ما يقوله الدكتور) .. قدامه
دقايق .. بدأ الموج يعلى .. بتعمل أيه يا
دكتور .. ؟ .. (تحاول أن تبدو مرحة) ..

بتدخن البايب .. (لنوح) بيسمع مزيقة ..
 مش تسمعى معاك يا دكتور .. السيمفونية
 الخامسة .. مرس يا دكتور .. فعلا باحبها
 .. انت لسه فاكّر .. ؟ .. حاضر يا دكتور
 .. (لنوح) .. عاوزنى اهتف وراه .. حاضر
 يا دكتور .. حاهتف وراك .. (تصمت
 لحظة ثم تهتف بصوت خافت) .. تحيا مصر
 .. تحيا مصر .. (تكاد نسمع معها صوت
 الأمواج) .. ألو .. ألو ..

(تضع الباعة وهى تدارى حزنها بنبالة ... لازال نوح
 قابضا على الطرف بشدة)

مدير الاحتفالات : (نفاقة ياخذ شكلا حماسيا جادا ، عليه

مسحة من التوسل) .. يا نوح يا عظيم ..
 يا أعظم من أنجبته الأرض .. انت أكبر منا
 كلنا .. أكبر من كل تصرفاتنا الصغيرة ..
 قلبك كبير . يغفر كل حاجة .. احنا تحت
 امرك فى كل شىء .. يالله ابتدى .. كل لحظة
 حاتتاخرها حاتفرق فيها قطعة من مصر ..
 مصر .. كل شىء فى حياتك وفى حياتنا ..
 آلاف السنين من التاريخ المكتوب بتبص لك
 دلوقت الزمن نفسه بيستنى أول خطوة منك
 .. يالله يا استاذ نوح .. افتح الطرف ..
 وطلع أوامر التشغيل والكشوف .. وبلغ
 الجهات اللى حاتنقل الناس اسكندرية ..

ناس مين ؟ .. قصدك عائلة فلان الفلانى :

نوح

.. ؟ .. كما كنت عملية نوح .. مفيش
 عملية نوح ..

نوح

: يا مجنون ...

(مدير الاحتفالات يتناول شيئا ثقيلا من حل المائدة ويهجم -
على نوح ليأخذ منه المظروف .. الجميع يساعدونه .. توحيد
يتدخل هو وفاطمة للدفاع عنه ، يتمكن من الإفلات ولكن
بعد أن يصاب بضرربة على رأسه .. يترنح .. لا زال ممسكا
بالمظروف ..)

توحيد

: أجرى يا نوح .. أجرى .. أجرى ..

(يجرى نوح هاربا)

: وراه ..

: أمسكوه وخذوا منه الظرف ..

: أقتلوه ...

(توحيد وفاطمة يمدان الباب بمسديهما للحظات إلى أن
يتغلب عليهما أعضاء المجلس ويجرون خارجين .. توحيد
وفاطمة وحدهما الآن ..)

فاطمة

: لو طلع على البيت حايمسكوه .. تفتكر
حايروح فين .. ؟

توحيد

: انا عاجز عن التفكير في أى شيء .. ما عرفش
ليه في اللحظة دى بافتكر أبويا .. الله يرحمه
كان راجل بسيط جدا .. ما دخلش
مدارس ... ساعات كنت أروح لسه في
مشكلة ما لهاش حل .. كان دايمما يقول
لى .. ارمى حملك على ربنا .. يالله بينا
يا مدام ..

(يخرجان .. تخفت الاضائة)

المشهد الأخير

(صالة مديشة في منزل ريفي يوحى بهز. قديم .. نافذة
كبيرة ويجوارها كرسي مداد طويل .. نوح في وسط
الغرفة .. يجلس على الأرض في منتصف المرح وقد
أشعل النار في اناه صغبر .. يلقي في النار بأوراق
فولسكاب)

نوح

: كلة في النار .. كلة لازم يولع .. مش حاخلى
حد .. دكاترة .. مهندسين .. محامين ..
صحافيين .. كتاب .. فنانيين .. لازم
أخلص على كل عائلة فلان الفلاني .. هم
فاكرين انهم حايفلبوني .. بالله .. كلة ..
ومش حايجصل لمصر حاجة .. عمر ما
حايجصل لها حاجة .. يجي الطوفان ..
يجي البحر .. تعالى يا بحر .. تعالى
يا طوفان .. حاتعمل ايه يعنى .. حاتكون
زى مين .. ؟ . الفرس والا الرومنا ؟ ..
حاتكون زى الفرنساويين والا زى الانجليز ..
والا زى الاتراك .. والا زى اليهود .. والا
حتى زى اخوانا المصريين اللي سجنونا
وعذبونا .. كلة يجي يولع .. هنا ..
وحاتستنى مصر .. كلة يفرق .. حايفضل
واحد وواحدة .. لازم حايفضل واحد
وواحدة .. فوق جبل .. حايملواها .. في
حثة عالية. قوى .. ولو ما فضلش حد ..
مش حايجصل حاجة .. الكوينين اللي
مشيوا حايجي منهم واحد وواحدة ..

حايعلوها .. واحد وواحدة كويسين ..
هم .. أما أنا كنت حافظ حتى غلطة ..
عشرة آلاف ايه .. ؟ .. ده احنا كثير قوى
.. ده احنا كلنا كويسين ... خلاص ..
أنا قضيت على عائلة فلان الفلاني ..
ولعبت فيهم ..

(يتحسس مؤخره رأسه ثم ينظر لكفه)

كله ولع تحول لرماد ..

(ينفض وهو يترنح في طريقه للكرسي .. يصل إليه ..
ساقاه لا تقويان على حمله .. يركع ويستند إلى مسند
الكرسي .. يذفن وجهه بين ماعديه للحظات ... الأداء هنا
هامس ورقيق ، يشع بالحزن النبيل ... أى محاولة
للأداء الانفعالي أو الأداء الزاعق ستنال من جلال المشهد
وتجعله أكثر وطأة . ان مشهد نهاية نوح لابد أن يقدم
في إطار من النبيل والبرقة الهامسة)

ماما آنا جيت يا ماما .. هاتى لى البيجاما :

... وحضرى لى الغدا ...

(يتأمل الأرض حوله)

ماما أنا آسف .. دى جه على الأرض ..
لكن البحر حاييجى .. حايينصف كل حاجة
ماما أنا بردان .. بردان جدا .. قطينى يا
ماما .. شيلينى يا ماما .. شيلينى هب ..
طلعينى على الكيرسى ده .. عاوز أشوف
النيل ... كنت حافظ غلطة كبيرة .. لكن
أنا خلصت عليهم كلهم .. ماما اعملى لى
عروسة ورق .. أنا عيان ... اعملى لى

نوح

عروسة ورق وخرميتها .. وولهيها .. أنا
ولعت فيهم كلهم .

(يتشبث بالمقعد)

.. ماما غطينى .. لسه بردان .. خدينى
فى صدرك .. دفينى ..

(انها لحظات النهاية ، جسمه ينحسر من على جانب
المقعد ويبدأ فى السقوط ببطء فى اللحظة التى يدخل فيها
توحيد وفاطمة)

: نوح ...

فاطمة

(يسرعان اليه ، يحملانه برفق ويشمانه على المقعد ..

توحيد ينقل بصره بين الأرض ومؤخرة رأسه)

: (هامسا لفاطمة) .. أصابته خطيرة .. نرف

توحيد

كثير ..

: (هامسا) .. بردان .. غطينى ..

نوح

(فاطمة تصرخ لغطاء قريب وتضعه عليه)

: نوح .. نوح .. أنا فاطمة يا نوح .. ومعايا

توحيد

توحيد ..

: أزيك يا واد يا رزل ؟ .. عرفتوا بيت العائلة

نوح

أزاي ..

: بندور عليك بقى لنا عشر ساعات .. وأخيراً

توحيد

أدركت أنك لازم تيجى المكان اللى اتولدت

فيه .. نوح .. أنا حاجيب دكتور فوراً ..

: متأخر يا توحيد ..

نوح

: حاسنين بآيه ..

فاطمة

: الشئ الوحيد اللى ما حسيتش بيه طول

نوح

همرى .. بالسلام .. أنا هادى جدا ..

هدوء جميل ولذيد .. (يسرح ببصره عبر
 النافذة) .. النيل جميل قوى يا ولاد ..
 بلاش نضيع وقت .. فيه ظرف صغير في
 جيبى الشمال .. فيه كل حاجة تمك ...
 أسماء وعناوين وأرقام تليفونات .. روح
 لهم .. وأشرح خطتك .. فيه وقت كفاية
 عشان تنفذوا عملية .. عملية توحيد ..
 : حاسمها عملية نوح ..

توحيد
 نوح

: عارف يا توحيد .. ساعات باحسن انك جزء
 منى .. عارف انت مين يا توحيد .. ؟ ..
 انت نوح .. انت الجزء الرزل اللى فى ...
 انفصل وأصبح على هيئة انسان .. بالله
 يا توحيد .. بالله يا فاطمة ..

فاطمة
 نوح

: أنا حاستنى معاك يا نوح ..
 : تستنى تعملى أبه .. أنا عارف انها
 دقائق بالنسبة لى ..

فاطمة
 نوح

: أنا حرة فى حياتى ..
 : واللى فى بطنك .. ؟ .. هى دى غلطتى يا
 فاطمة .. لما حسيت انى جبر فى حياة
 الآخرين .. (لتوحيد) .. توحيد .. أبنى ،
 حاطلمه أبه ؟

توحيد

: حاخليه يحب الزيكه والشعر ... ويفهم فى
 التاريخ .. حاخليه يعرف يضحك من قلبه
 .. حاعلمه ازاى يحب كل حاجة حواليه ..
 : (يصمت للحظات) .. أنا عاوزه يطلع زيك
 يا توحيد .. رزل ... عاوزه يصرف يقول
 لا .. شغلى البيك اب يا فاطمة ..
 (فاطمة تسرع لبيك أب قديم)

نوح

: ولع لى سيجارة يا توحيد .. أنا مش بردان
دلوقت .. أنا دفيان جدا ..

(توحيد يشعل سيجارة .. يقترب بها من فم نوح ..
شئ ما فى هينه يجمله يتراجع بها .. يمسك السيجارة
ويفركها بين كفيه فى ألم .. تأق فاطمة وتنظر لنوح ..
تتمالك نفسها فى نبالة .. ترفع الغطاء على رأسه ..
يأخذها توحيد من ذراها ويتجه بها الخارج .. يتوقفان
فى كادر ثابت .. ترتفع الموسيقى .. سيفونية النصر
ليبيتهوفن ... قوية .. هادرة .. بأقصى طاقة لساعات
المسرح .. تحفت الاضواء .. تنزل

(الستار)

للمؤلف

- ♦ الناس التي في السما الثامنة
- ♦ ولا الطفارت الكروي
- ♦ الزاجل التي صحتك هي الملايكة
- ♦ بير القمح
- ♦ اغنية على المهر
- ♦ البوفية
- ♦ حدث في عزبة الورد
- ♦ انت التي قتلت الوحش
- ♦ عفاريت مصر الجديدة
- ♦ الملوك يدخلون القرية

أعمال بمصر عن المسرح الفرنسي

- ♦ طببخ الملايكة
- ♦ حب لا ينتهي
- ♦ مدرسة المشافيين
- ♦ الصيال الطيبين
- ♦ روعة القلب

دار « نافع » للطباعة - ت ٩٠٠١١٨

رقم الايداع ١٩٧٤/٥٣٥٩

دار الثقافة الجديدة

تقدم قريبا بالاضافة الى مطبوعاتها الاقتصادية والسياسية
مجموعة قوية من احدث الاعمال الادبية العربية والاجنبية

مسرَّحات

♦ رسول قرية تميرة لبحث مسائل الحرب والسلام

تأليف محمود دياب

اعداد نجيب سرور

♦ ملك الشحاتين

للمرحوم ميخائيل رومان

♦ العرض الحلي

للكاتب الكوبي خوزيه تريانا

♦ ليلة القتلة

ترجمة فتحي العشري

روايات

لغالب هلسا

♦ الخماسين

لجمال الفيطناتي

♦ وقائع حارة الزعفراني

للكاتب الاميركي جيمس دروت

♦ الصدو

ترجمة صنع الله ابراهيم

شعر

♦ ديوان احمد فؤاد نجم

لعبد الصبور منير

♦ ما تيسر من سورة العبور

للشاعرة السوفيتية الطليعية

♦ حمى

بلا احمدوليننا

سينما

ترجمة د . رفيق الصبان

♦ سيناريو فيلم زد

سيناريو شوقي عبد الحكيم ،

♦ شفيقة ومتولى

سيد عيسى

♦ الفيلم بين الفكر وشبالة التذاكر للناقد السوفيتي كاراجانوف

« على سالم يخدعكم ، انه لا يكتب الكوميديا الضاحكة ولكن يقدم التراجيديا بلا دموع » ... د. على الراعي

الاسم : نوح محمد على

المهمة : انقاذ مصر من الفرق

كانت خطته محكمة وجريئة ، وعندما وصل الى مرحلة التنفيذ ، تحول الأمر كله الى ملهاة ، او لعلها ماساة



.726
53a



0209234